

漢書門			
四	二	一	
四	七	七	
一	九	八	
冊	架	函	號類

庫文閣内	
六	四
八	二
二	八
〇	八
架	冊
號	類

内閣文庫	
番號	漢 4417
冊數	18 (3)
函號	280 70

0 1 2 3 4 5 6 7 8 9



綴じ部(喉部分)の文字など開きが不鮮明な箇所あり

隋書卷十一

禮儀志第六

大尉揚州都督監脩國史上柱國趙國公臣長孫無忌等奉勅撰

皇明朝列大夫國子監祭酒臣方從哲

承直郎國子監司業臣楊道賓等奉

勅重較刊

皇明朝列大夫國子監祭酒臣吳士元

承德郎司業仍加俸一級臣黃錦等奉

旨重修

禮儀六

梁制乘輿郊天祀地禮明堂祠宗廟元會臨軒則黑介
幘通天冠平冕俗所謂平天冠者也其制玄表朱綠裏
廣七寸長尺二寸加於通天冠上前垂四寸後垂三寸
前圓而後方垂白玉珠十有二旒其長齊肩以組為纓

各如其綬色傍垂黠纒琉珠以玉瑱其衣阜上絳下前
三幅後四幅衣畫而裳繡衣則日月星辰山龍華蟲火
宗彝畫以爲纒裳則藻粉米黼黻以爲繡凡十二章素
帶廣四寸朱裏以朱繡禪飾其側中衣以絳緣領袖赤
皮爲鞞蓋古之鞞也絳袴袜赤舄佩白玉垂朱黃大綬
黃赤纒紺四采革帶帶劔緹帶以組爲之如綬色黃金
辟邪首爲帶鏞而飾以白玉珠又有通天冠高九寸前
加金博山述黑介幘絳紗袍阜緣中衣黑舄是爲朝服
元正賀畢還儲更衣出所服也其釋奠先聖則阜紗袍
絳緣中衣絳袴袜黑舄臨軒亦服袞冕未加元服則空

頂介幘拜陵則笄布單衣介幘又有五梁進賢冠遠遊
平上幘武冠單衣黑介幘宴會則服之

單衣白帻以代古之疑衰皮弁爲弔服爲羣臣舉哀臨
喪則服之

天監三年何佟之議公卿以下祭服裏有中衣卽今之
中單也案後漢輿服志明帝永平二年初詔有司採周
官禮記尚書乘輿服從歐陽說公卿以下服從大小夏
侯說祭服絳緣領袖爲中衣絳袴袜示其赤心奉神今
中衣絳緣足有所明無俟於袴旣非聖法請不可施遂
依議除之

四年有司言平天冠等一百五條自齊以來隨故而毀未詳所送何修之議禮祭服敝則焚之於是並燒除之其珠玉以付中署

七年周捨議詔旨以王者衮服宜畫鳳皇以示差降按禮有虞氏皇而祭深衣而養老鄭玄所言皇則是畫鳳皇羽也又按禮所稱雜服皆以衣定名猶加衮冕則是衮衣而冕明有虞言皇者是衣名非冕明矣畫鳳之旨事實灼然制可又王僧崇云今祭服三公衣身畫獸其鬣及袖又有青獸形與獸同義應是雌卽宗彝也兩袖各有禽鳥形類鸞鳳似是華蟲今畫宗彝卽是周禮但

鄭玄云雌螭屬昂鼻長尾是獸之輕小者謂宜不得同獸尋冕服無鳳應改爲雉又裳有圓花於禮無礙疑是畫師加葩蕪耳藻米黼黻並乖古制今請改正并去圓花帝曰古文日月星辰此以一辰攝三物也山龍華蟲又以一山攝三物也藻火粉米又以藻攝三物也是爲九章今衮服畫龍則宜應畫鳳明矣孔安國云華者花也則爲花非疑若一向畫雉差降之文復將安寄鄭義是所未允又帝曰禮王者祀昊天上帝則大裘而冕祀五帝亦如之又云莞席之安而蒲越橐秸之用斯皆至敬無文貴誠重質今郊用陶匏與古不異而大裘蒲秸

獨不復存其於質敬恐有未盡且一獻爲質其劔佩之飾及公卿所著冕服可共詳定五經博士陸瑋等並云祭天猶存掃地之質而服章獨取黼黻爲文於義不可今南郊神座皆用苜蓿席此獨莞類未盡質素之理宜以橐秸爲下藉蒲越爲上席又司服云王祀昊天服大裘明諸臣禮不得同自魏以來皆用衮服今請依古更制大裘制可瑋等又尋大裘之制唯鄭玄注司服云大裘羔裘也旣無所出未可爲據案六冕之服皆玄上纁下今宜以玄纁爲之其制式如裘其裳以纁皆無文纁冕則無旒詔可○又乘輿宴會服單衣黑介幘舊三日九日小會初出乘今輅服之

八年帝改去還皆乘輦服白紗帽

九年司馬筠等參議禮記玉藻云諸侯玄冕以祭禋冕以朝雜記又云大夫冕而祭於公弁而祭於己今之尚書上異公侯下非卿士止有朝衣本無冕服但旣預齋祭不容同在於朝宜依太常及博士諸齋官例著皂衣絳襪中單竹葉冠若不親奉則不須入廟帝從之十一年尚書參議按禮跣屨事由燕坐屨不宜陳尊者之側今則極敬之所莫不皆跣清廟崇嚴旣絕恒禮凡有履行者應皆跣屨詔可

陳永定元年武帝卽位徐陵白所定乘輿御服皆採梁之舊制又以爲冕旒後漢用白玉珠晉過江服章多闕遂用珊瑚雜珠飾以翡翠侍中顧和奏今不能備玉珠可用白玳從之蕭驕子云白玳蚌珠是也帝曰形制依此今天下初定務從節儉應用繡織成者並可彩畫金色宜塗珠玉之飾任用蚌也至天嘉初悉改易之定令具依天監舊事然亦往往改革今不同者皆隨事於注言之不言者蓋無所改制云

皇太子金璽龜鈕朱綬

三百二十首

朝服遠遊冠金博山佩

瑜玉翠綫垂組朱衣絳紗袍皁緣白紗巾衣白曲領帶

鹿盧劔火珠首素革帶玉鈎變獸頭鞞囊其大小會祠

廟朔望五日還朝皆朝服常還上宮則朱服若釋奠則

遠遊冠玄朝服絳緣中單絳袴袂玄烏講則著介幘又

有三梁進賢冠其侍祀則平冕九旒袞衣九章白紗絳

緣中單絳繪鞞赤烏絳鞞若加元服則中舍執冕從皇

太子舊有五時朝服自天監之後則朱服在上省則烏

帽永福省則白帽云

諸王金璽龜鈕纁朱綬

一百六十首

朝服遠遊冠介朱衣絳

紗袍皁緣中衣素帶黑烏佩山玄玉垂組大帶獸頭鞞

胛劔若加餘官則服其加官之服

開國公金章龜紐玄朱綬二百四十首朝服紗朱衣進賢三

梁冠佩山玄玉獸頭鞞署劔

開國侯伯金章龜鈕青朱綬一百二十首朝服紗朱衣進賢

三梁冠佩水蒼玉獸頭鞞署劔

開國子男金章龜鈕青綬一百首朝服紗朱衣進賢三梁

冠佩水蒼玉獸頭鞞署劔

縣鄉亭關內關中及名號侯金印龜紐紫綬朝服進賢

二梁冠獸頭鞞署劔關內關中及名號侯則珪紐

關外侯銀印珪紐青綬朝服進賢二梁冠獸頭鞞署劔

諸王嗣子金印珪紐紫綬八十首朝服進賢二梁冠佩山

玄玉獸頭鞞署劔

開國公侯嗣子銀印珪紐青綬八十首朝服進賢二梁冠

佩水蒼玉獸頭鞞署劔

太宰太傅太保司徒司空金章龜鈕紫綬八十首朝服進

賢三梁冠佩山玄玉獸頭鞞署劔陳令加有相國丞相服制同

大司馬大將軍太尉諸位從公者金章龜鈕紫綬八十首

朝服武冠佩山玄玉獸頭鞞署劔直將軍則不帶劔

凡公及位從公言以將軍及以左右光祿開府儀同者各隨本位號其文則曰某位號儀同之

章五等諸侯助祭郊廟皆平冕九旒青玉為珠有前無

後各以其綬色為組纓旁垂黹纁衣玄上纁下畫山龍

已下九章備五采大佩赤舄胸履錄尚書無章綬品秩
悉以餘官摠司其任服則餘官之服猶執笏紫荷其在
都坐則東面最上

尚書令僕射尚書銅印墨綬朝服納言幘進賢冠佩水

蒼玉尚書則無印綬署劔紫荷執笏陳尚書令僕射金章龜鈕紫綬八十首獸頭鞞尚書

無印綬及鞞餘並同梁

侍中散騎常侍通直常侍員外常侍朝服武冠貂蟬侍中

左插常侍右插皆署劔佩水蒼玉其員外常侍不給佩舊至尊朝會登殿

侍中常侍夾御御下輿則扶左右侍中驂乘則不帶劔

中書監令祕書監銅印墨綬朝服進賢兩梁冠佩水蒼

玉署劔獸頭鞞陳制銀章龜鈕青綬八十首獸頭鞞青劔餘同梁

左右光祿大夫皆與加金章紫綬同其但加金紫者謂

之金紫光祿但加銀青者謂之光祿大夫陳今有持進賢二梁冠

朝服佩水蒼玉署劔梁令不載

光祿太中中散大夫太常光祿弘訓太僕太僕廷尉宗

正大鴻臚大司農少府大匠諸卿丹陽尹太子保傅大

長秋太子詹事銀章龜鈕青綬獸頭鞞朝服進賢冠二

梁佩水蒼玉卿大夫助祭則冠平冕五旒關為節有

前無後各以其綬采為組纓旁垂黻纁衣玄上纁下畫

華蟲七章皆佩五采大佩赤舄胸履陳宮卿改云慈訓餘皆同梁又有大

萬曆二十六年刊

舟艘服

章同

驃騎車騎衛將軍中軍冠軍輔國將軍四方中郎將金

章紫綬中郎將則青綬朝服武冠佩水蒼玉陳令鎮衛驃騎車騎中軍中衛中撫

軍中權四征四鎮四安四翊四平將軍金章獸鈕其冠

武冠佩水蒼玉自中軍已下諸將軍及冠軍四方中郎將並官不給佩

領護軍中領護軍五營校尉銀印青綬朝服武冠佩水

蒼玉獸頭鞞其屯騎夾御日假給佩餘校不給陳令領護金章

龜鈕紫綬八十首中領護銀章龜鈕青綬八十首其五

營校尉銀印珪鈕青綬八十首官不給佩餘並同梁

弘訓衛尉衛尉陳宮卿云慈訓服同諸卿但武冠司隸校尉陳無左右

衛驃騎游擊前左右後軍將軍龍驤寧朔建威振威奮

威揚威廣威武威建武振武奮武揚武廣武等將軍積

弩積射強弩將軍監軍銀章青綬朝服武冠佩水蒼玉

獸頭鞞驃游已下並不給佩驃游夾侍日假給陳令左右衛銀

章龜鈕不給劔左右驃騎游擊雲騎游騎前左右後軍

將軍左右中郎將銀印珪鈕餘服飾同梁亦官不給佩

其驃游雲騎夾御口假給其積弩積射強弩銅印環鈕

墨綬帶劔餘服同梁又有忠武軍師武臣瓜牙龍騎雲

塵鎮兵翊帥宣惠宣毅智威仁威勇威信威嚴威智武

仁武勇武信武嚴武金章豹鈕紫綬八十首官不給輕

車鎮朔武旅貞毅朔威寧遠安遠征遠振遠宣遠等

將軍金章豹鈕紫綬並獸頭鞞朝服武冠佩水蒼玉

國子祭酒早朝服進賢二梁冠佩水蒼玉

御史中丞都水使者銀印墨綬朝服進賢二梁冠獸頭

鞞翬劔佩水蒼玉陳中丞銀章龜鈕青綬八十首二梁

服在諸卿中見

謁者僕射銅印環鈕墨綬八十朝服高山冠獸頭鞞佩

水蒼玉署劔

諸軍司銀章龜鈕青綬朝服武冠獸頭鞞

給事中黃門侍郎散騎通直員外散騎侍郎奉朝請太

子中庶子庶子武衛將軍武騎常侍朝服武冠署劔陳

庶子已上簪筆其武衛不劔正直夾御白布袴褶

中書侍郎朝服進賢一梁冠署劔冗從僕射太子衛率

銅印墨綬獸頭鞞朝服武冠陳衛率銀章龜鈕青綬不劔冗從銅印環鈕墨綬署

劔餘布同梁

武賁中郎將羽林監銅印環鈕墨綬朝服武冠獸頭鞞

署劔其在陛牙及備鹵簿著毼尾絳紗縠單衣

護匈奴中郎將護羌戎夷蠻越烏丸西域校尉銀印珪

鈕青綬朝服武冠獸頭鞞陳令無此官其庶子鎮蠻寧蠻平戎西戎校尉平越中郎

將服章同

安夷撫夷護軍州郡國都尉奉車駙馬騎都尉諸護軍

銀印珪鈕青綬獸頭鞞朝服武冠陳安遠鎮蠻護軍州郡國都尉奉車駙馬

騎都尉諸護軍服章同無餘文

州刺史銅印墨綬獸頭鞞署劔絳朝服進賢二梁冠陳

章龜鈕青綬餘同梁

萬曆二十六年刊

禮部志

禮部志

九

郡國太守相內史銀章龜鈕青綬獸頭鞞單衣介幘加
中二千石依卿尹冠服劔佩

尚書左右丞秘書丞銅印環鈕黃綬獸爪鞞朝服進賢
一梁冠

尚書祕書著作郎太子中舍人洗馬舍人朝服進賢一
梁冠鞞劔

諸王友文學朱服進賢一梁冠陳令諸王師服同

治書侍御史侍御史朝服鞞劔法冠治書侍御史則有銅印環鈕墨綬陳

又有殿中蘭臺侍御史朝服法冠鞞劔簪筆

諸博士給皂朝服進賢兩梁冠佩水蒼玉

太學博士正限八人著佩限外六人不給

廷尉律博士無佩並簪筆

國子助教皂朝服進賢一梁冠簪筆

公府長史獸頭鞞諸卿尹丞黃綬獸爪鞞簪筆

諸縣署令秩千石者獸爪鞞銅印環鈕墨綬朝服進賢

兩梁冠長史朱服諸卿尹丞建康令玄服

公府掾屬主簿祭酒朱服進賢一梁冠公府令史亦同

領護軍長史朱服獸頭鞞諸軍長史單衣介幘獸頭鞞

諸卿部丞獄丞並皂朝服一梁冠黃綬獸爪鞞簪筆

太子保傅詹事丞皂朝服一梁冠簪筆獸爪鞞黃綬

郡國相內史丞長史單衣介幘長史獸頭鞞其丞黃綬
獸爪鞞

諸縣署令長相單衣介幘獸頭鞞銅印環鈕墨綬朝服
進賢一梁冠諸署令朱衣武冠州都大中正郡中正單
衣介幘

太子門大夫獸頭鞞陵令長獸爪鞞銅印環鈕墨綬朝
服進賢一梁冠令長朱服率更家令僕朝服兩梁冠獸
頭鞞署劔

黃門諸署令僕長丞朱服進賢一梁冠銅印環鈕墨綬
丞黃綬黃門冗從僕射監太子寺人監銅印環鈕墨綬
朝服武冠獸頭鞞

公府司馬領護軍司馬諸軍司馬護匈奴中郎將護羌
戎夷蠻越烏丸戊巳校尉長史司馬銅印環鈕墨綬獸
頭鞞朝服武冠諸軍司馬單衣平巾幘長史介幘

司馬領護軍司馬諸軍司馬鎮安蠻安遠護軍蠻
戎越校尉中郎將長史司馬其服章與梁官同
公府從事中郎朱服進賢一梁冠諸將軍開府功曹主
簿單衣介幘革帶廷尉建康正監平銅印環鈕墨綬阜
零辟朝服法冠獸爪鞞

左右衛司馬銅印環鈕墨綬單衣帶平巾幘獸頭鞞
諸府參軍單衣平巾幘

諸州別駕治中從事主簿西曹從事玄朝服進賢一梁冠簪筆常公事單衣介幘朱衣

直閣將軍朱服武冠銅印珪鈕青綬獸頭鞶

直閣將軍諸殿主帥朱服武冠正直絳衫從則襦襜衫

諸開國郎中令大農公傳中尉銅印環鈕青綬朝服進

賢兩梁冠中尉武冠皆獸頭鞶

諸開國二將軍銅印環鈕青綬朝服武冠限外者不給

印 陳制墨綬 餘並同梁

開國掌書中尉司馬陵廟食官廐牧長典醫典府丞銅

印常侍侍郎世子庶子謁者中大夫舍人不給印典書

典祠學官令典膳丞長銅印限外者不給印

左右常侍侍郎典衛中尉司馬朝服武冠典書典祠學

官令朝服進賢一梁冠餘悉朱服一梁冠

令簪筆 書典祠學官

太子衛率率更家令丞銅印環鈕黃綬阜朝服進賢一


梁冠獸爪鞶

太子常從武賁督銅印環鈕墨綬朝服武冠獸爪鞶

殿中將軍員外將軍朱服武冠

州郡國都尉司馬銅印環鈕墨綬朱服武冠獸頭鞶

諸謁者朝服高山冠



中書通事舍人門下令史主書典書令史門下朝廷局
書令史太子門下通事守舍人主書典守舍人二宮齋
內職左右職局齋幹已上朱服武冠

殿中內外局監太子內外監殿中守舍人銅印環鈕朱
服武冠

內外監典事書吏朱服進賢一梁冠內監朝廷人領局
典事外監統軍隊諮詳發遣局典事武冠外監及典事
書吏悉著朱衣唯正直及齋監并受使不在例其東宮
內外監殿典事書吏依臺格五校三將將軍主事內監
主事外監主事二校主事朱服武冠

尚書都令史都水參事門下書令史集書中書尚書祕
書著作掌書主書主圖主譜典客令史書令史監令僕
射省事蘭臺殿中蘭臺謁都令史公府令史書令史太
子導客次客守舍人及諸省典事朱衣進賢一梁冠

尚書都筆度支筆左戶校吏朱服進賢一梁冠

諸縣署丞太子諸署丞王公侯諸署及公主家令丞僕
銅印環鈕黃綬朱服進賢一梁冠太官太醫丞武冠
諸縣尉銅印環鈕單衣介幘黃綬獸爪鞞節騎郎朱服
武冠其在陛列及備鹵簿者髡尾絳紗縠單衣御節郎
黃鉞郎朝服赤介幘簪筆典儀唱警唱奉事持兵主麾

等諸職公事及備鹵簿朱服武冠殿中守郎將校尉都尉銀印珪鈕青綬朱服武冠獸頭鞞

城門候銅印環鈕墨綬朱服武冠獸頭鞞

部曲督司馬吏部曲將銅印環鈕朱服武冠司馬吏假墨綬獸爪鞞

太中中散諫議大夫議郎守郎郎中舍人朱服進賢一梁冠

諸門郎僕射佐吏東宮門吏其郎朱服僕射皂零辟朝服進賢冠吏却非冠佐吏著進賢冠

總章協律銅印環鈕艾綬獸爪鞞朱服武冠

黃門後閣舍人主書齋帥監食主客扶持鼓吹朱服武冠鼓吹進賢冠齋帥墨綬獸頭鞞

殿中司馬銅印環鈕墨綬朱服武冠獸頭鞞

總章監鼓吹監銅印環鈕艾綬朱服武冠

諸四品將兵都尉牙門將崇毅材官折難輕騎揚烈威遠寧遠宣威光威驤威威烈威虜平戎綬遠綬狄綬邊綬戎獸威威武烈武毅武奮武討寇討虜殄難討難討夷厲武橫野陵江鷹揚執訊蕩寇蕩虜蕩難蕩逾殄虜掃虜掃難掃逾掃寇厲鋒武奮武牙廣野領兵滿五十人給銀章不滿五十除板而已不給章朱服武冠以此

官爲刺史太守皆青綬

此條已下皆陳制與梁不同

典儀但帥典儀正帥朱衣武冠其本資有殿但正帥得帶艾綬獸頭鞞殿但帥正帥艾綬獸頭鞞朱服武冠殿帥羽儀帥員外帥朱衣武冠

威雄猛烈振信勝略風力光等十威將軍武猛略勝力毅健烈威銳勇等十武將軍並銀章熊鈕青綬獸頭鞞武冠朝服

猛毅烈威銳震進智威勝駿等十猛將軍銀章熊鈕青綬獸頭鞞武冠朝服

壯武勇烈猛銳威毅志意力等十壯將軍驍雄桀猛烈武勇銳名勝迅等十驍將軍雄猛威明烈信武勇毅壯

健等十雄將軍並銀章羔鈕青綬獸頭鞞武冠朝服忠勇烈猛銳壯毅捍信義勝等十忠將軍明智略遠勇

烈威勝進銳毅等十明將軍光烈明英遠勝銳命勇武野等十光將軍颯勇猛烈銳奇決起略勝出等十颯將軍

軍並銀章鹿鈕青綬獸頭鞞武冠朝服龍驤武視雲旗風烈電威雷音馳銳進銳羽騎突騎折

衝冠武和戎安壘起猛英果掃虜掃狄武銳摧鋒開遠略遠貞威決勝清野堅銳輕銳拔山雲勇振旅等三十

號將軍銀印菟鈕青綬獸頭鞞朝服武冠

超武鐵騎樓船宣猛樹功剋狄平虜稜威戎昭威戎伏
波雄戟長劔衝冠雕騎伏飛勇騎破敵剋敵威虜前鋒
武毅開邊招遠全威破陣蕩寇殄虜橫野馳射等三十
號將軍銅印環鈕墨綬獸頭鞞朝服武冠并左十二件
將軍除並假給章印綬板則止朱服武冠而已
其勳選除亦給

章印

建威牙門期門已下諸將軍並銅印環鈕墨綬獸頭鞞
朱服武冠板則無印綬止冠服而已其在將官以功次
轉進應署建威已下諸號不限板除悉給印綬
若武官署位轉進登上條九品馳尉已上諸戎號亦不限板除悉給印綬

千人督校督司馬武賁督牙門將騎督督守將兵都尉
太子常從督別部司馬假司馬假銅印環鈕朱服武冠
墨綬獸頭鞞

武猛中郎將校尉都尉銅印環鈕朱服武冠其以此官
爲千人司馬道賁督已上及司馬皆假墨綬獸頭鞞

東制梁所無及不同者

陸長甲僕射主事吏將騎廷上五牛旗假吏武賁在陸
列及備鹵簿服錦文衣武冠駝尾陸長者假銅印環鈕
墨綬獸頭鞞

假旄頭羽林在陸列及備鹵簿服絳單衣上著章畫翬

襦假旄頭輿輦迹禽前驅由基強弩司馬給絳科單衣
武冠其本位佩武猛都尉已上印者假墨綬別部司馬
已下假墨綬並獸頭鞶

殿中冗從武賁殿中武賁持鈹戟冗從武賁假青綬絳

科單衣武冠

陳令絳科單衣其本位職佩武猛都尉等印假鞶綬依前條

持椎斧武騎武賁五騎傳詔武賁殿中羽林太官嘗食

武賁稱飯宰人諸宮嘗食武賁假墨綬給絳禱武冠佩

武猛都尉等位印皆依上條假鞶綬之例

其在陛列及備鹵簿五騎武賁服錦文衣毳尾宰人服

雜文衣領軍捉刃人烏總帽袴褶皮帶

絙是羽葆毼鼓吹悉改著進賢冠外給系毼鼓吹著武

冠諸官鼓吹尚書廊下都坐門下使守藏守閣殿中威

儀騶武賁常直殿門雲龍門者門下左右部武賁羽林

騶給傳事者諸導騶門下中書守閣尚書門下武賁羽

林騶蘭臺五曹節藏僕射廊下守閣威儀發符騶都水

使者廊下守給騶謁者威儀騶諸宮謁者騶絳禱武冠

衣服如舊大誰天門士阜科單衣樊噲冠衛士涅布禱

却敵冠

諸將軍使持節都督執節史朱衣進賢一梁冠自此條已下皆

陳制梁所無

持節節史單衣介幘其纂戎戒嚴時同使持節制假節

節史單衣介幘凡節跌以石為之持節皆刻為犖犖形假節及給蠻夷節皆刻為狗頭跌

諸王典籤帥單衣平巾幘典籤書吏袴褶平巾幘

諸王書佐單衣介幘

公府書佐朱衣進賢冠

諸王國舍人司理謁者閣下令史中衛都尉朱衣進賢

一梁冠司理假銅印謁者高山冠令史已下武冠

太子太傅五官功曹主簿早朝服進賢一梁冠

太子二傅門下主記錄事功曹書佐門下書佐記室帳

下督都督省事法曹書佐太傅外都督早衣進賢一梁

冠

太子妃家令絳朝服進賢一梁冠

太子三校二將積弩殿中將軍衣服皆與上官官同

太子正員司馬督題閣監銅印墨綬三校內王事主章扶持

守舍人衣帶仗局服飾衣局珍寶朝廷主衣統奏事幹

內局內幹朱衣武冠

諸公府御屬及省事錄尚書省事太子門下及內外監

丞典事導客筭書吏次功典書函典書典經五經典書

諸守宮舍人市買清慎食官督內直兵吏宣華崇賢二

門舍人諸門吏朱衣進賢一梁冠

太子妃傳令朱衣武冠執刀烏信幡

太子二傳騎吏玄衣赤幘武冠常行則袴褶執儀齋帥
殿帥典儀帥傳令執刀戟主蓋扇麾繖殿上持兵車郎
扶車注疏萌床齋閣食司馬唱導飯主食殿前帥殿前
威儀武賁威儀散給使閣將鼓吹士帥副武冠絳襜褕
輓小輿持車輅車給使平巾幘黃布袴褶赤罽帶

太子諸門將涅布襜褕冠

太子鹵簿戟吏赤幘武冠絳襜褕帥整陣禁防平巾幘
白布袴褶鞞角五音帥長麾青布袴褶岑帽絳絞帶都
伯平巾幘黃布袴褶

文官曹幹白紗單衣介幘尚書二臺曹幹亦同

武官問訊將士給使平巾幘白布袴褶

通天冠高九寸正豎頂少斜却乃直下鐵爲卷梁前有
展筩冠前加金博山述乘輿所常服

遠遊冠制似通天而前無山述有展筩橫于冠前皇太
子及王者後諸王服之諸王加官者自服其官之冠服
唯太子及王者後常冠焉太子則以翠羽爲綏綴以白
珠其餘但青絲而已

進賢冠古緇布冠遺象也斯蓋文儒者之服前高七寸
後高二寸長八寸有五梁三梁二梁一梁之別五梁唯

天子所服其三梁已下爲臣高卑之別云

武冠一名武弁一名大冠一名繁冠一名建冠今人名曰籠冠卽古惠文冠也天子元服亦先加大冠今左右侍臣及諸將軍武官通服之侍中常侍則加金紫焉挿以貂尾黃金爲飾云

高山冠一名側注高九寸鐵爲卷梁制似通天頂直豎不斜無山述展簞高山者取其矜莊賓遠中外謁者僕射服之

法冠一名柱後或謂之獬豸冠高五寸以縱爲展簞鐵爲柱卷取其不曲撓也侍御史廷尉正監平凡執法官皆服之

鶡冠猶仄冠也加雙鶡尾豎挿兩邊故以名焉武賁中郎將羽林監節騎郎在陛列及鹵簿者服之

長冠一名齋冠高七寸廣三寸漆纚爲之制如版以竹爲裏漢高祖微時以竹皮爲此冠所謂劉氏冠後除竹用漆纚焉司馬彪曰長冠楚制也人間或謂之鵲尾冠非也後代以爲祭服尊敬之也至天監三年祠部郎沈宏議案竹葉冠是高祖爲亭長時所服安可縣代爲祭服哉禮士弁祭於公請令太常丞博士奉齋之服宜改用爵弁明山賓同宏議司馬聚云若必遵三王則懼所

改非一長冠謂宜仍舊案今之宗丞博士之服未有可
非帝竟不改

建華冠以鐵爲柱卷貫大銅珠九枚祀天地五郊明堂
舞人服之

樊噲冠廣九寸高七寸前後出各四寸制似平冕凡殿
門司馬衛士服之

却敵冠高四寸通長四寸後高三寸制似進賢冠凡宮
殿門衛士服之

却非冠高五寸制似長冠宮殿門吏僕射冠之
幘尊卑貴賤皆服之文者長耳謂之介幘武者短耳謂

之平上幘各稱其冠而制之尚書令僕射尚書幘收方
三十名曰納言未冠童子幘無屋施假髻者示未成人
也

幘傅子云先未有歧荀文若巾觸樹成歧時人慕之因
而弗改今通爲慶弔之服白紗爲之或單或袂初婚冠

送餞亦服之

巾國子生服白紗爲之晉太元中國子生見祭酒博士
單衣角巾執經一卷以代手版宋末闕其制齊立學太

尉王儉更造今形如之
帽自天子下及士人通冠之以白紗者名高頂帽皇太

萬曆二十六年刊
禮儀志

子在上省則烏紗在永福省則白紗又有繪阜雜紗爲之高屋下裙蓋無定准

袴褶近代服以從戎今纂嚴則文武百官咸服之車駕親戎則縛袴不舒散也中官紫褶外官絳褶膏皮帶以代鞞革

笏中世以來唯八座尚書執笏笏者白筆綴其頭以紫囊裹之其餘公卿但執手版荷紫者以紫生爲袂囊綴之服外加於左肩周遷云昔周公負成王制此衣至今以爲朝服蕭驕子云名契囊案趙充國傳云張子孺持囊簪筆事孝武帝張晏云囊契囊也近臣負囊簪筆從備顧問有所記也

入殿門有籠冠者著之有纓則下之緣廂行得提衣省閣內得著履烏紗帽入齊門及橫度殿庭不得人提衣及捉服飾入閣則執手板自摳衣几席不得入齋正閣介幘不得上正殿及東西堂儀仗繖扇有幘牽車不得入臺門臺官問訊皇太子亦皆朱服著襪謁諸王單衣幘庶姓單衣恰詣三公必衣恰至黃閣下履過閣還著履古者君臣佩玉尊卑有序綬者所以貫佩相承受也又上下施鞞如蔽膝貴賤亦各有殊五霸之後戰兵不息佩非兵器鞞非戰儀於是解去佩鞞留其繫襪而已鞞

佩既廢秦乃以采組連結於綵轉相結受又謂之綬漢承用之至明帝始復制佩而漢末又亡絕魏侍中王粲識其形乃復造焉今之佩粲所制也

皇后謁廟服袿襜大衣蓋嫁服也謂之禕衣阜上阜下親蠶則青上縹下比深衣制隱領袖緣以條首飾則假髻步搖俗謂之珠松是也簪珥步搖以黃金為山題貫白珠為支相繆八爵九華熊獸赤罷天鹿辟邪南山豐大特六獸諸爵獸皆以翡翠為華綬佩同乘輿

貴妃貴嬪貴姬是為三夫人金章龜紐紫綬八十一首佩于質王獸頭鞶

淑媛淑儀淑容昭華昭儀昭容脩華脩儀脩容是為九

嬪金章龜紐青綬八十首獸頭鞶佩采璫玉

婕妤容華充華承徽列榮五職亞九嬪銀印珪鈕艾綬

獸頭鞶

美人才人良人三職散位銅印環鈕墨綬獸頭鞶

皇太子妃金璽龜紐纁朱綬一百六十首佩瑜玉獸頭鞶

良娣銀印珪鈕佩采璫玉青綬八十首獸爪鞶

保林銀印珪鈕佩水蒼玉青綬八十首獸爪鞶

諸王太妃妃諸長公主公主封君金印龜紐紫綬八十首

佩山玄玉獸頭鞶

開國公侯太夫人銀印珪鈕青綬八十首佩水蒼玉獸頭

公主三夫人大手髻七鑲蔽髻九嬪及公夫人五鑲
世婦三鑲其長公主得有步搖公主封君已上皆帶綬
以綵組爲緄帶各以其綬色金辟邪首爲帶瑛公符進
列侯卿校中二千石夫人

紺繪襜黃金龍首銜白珠魚須擗長一尺爲簪珥入廟
佐祭者皁絹上下助蠶者縹絹上下皆深衣制緣自二
千石夫人已上至皇后皆以蠶衣爲朝服

自晉左遷中原禮儀多缺後魏天興六年詔有司始制
冠冕各依品秩以示等差然未能皆得舊制至太和中
方考故實正定前謬更造衣冠尚不能周洽及至熙平
二年太傅清河王懌黃門侍郎韋延祥等奏定五時朝
服准漢故事五郊衣幘各如方色焉及後齊因之河清
中改易舊物著令定制云

乘輿平冕黑介幘垂白珠十二旒飾以五采玉以組爲
纓色如其綬黹纁玉笄白玉璽黃赤綬五采黃赤縹綠
紺純黃質長二丈九尺五百首黃一尺二寸小綬長三
尺二寸與綬同采而首半之衮服皁衣絳裳裳前三幅
後四幅織成爲之十二章緣絳中單織成緄帶朱紱佩

白玉帶鹿盧劔絳袴赤舄未加元服則空頂介幘又有通天金博山冠則絳紗袍皁緣中單其五時服則五色介幘進賢五梁冠五色紗袍又有遠遊五梁冠並不通于下四時祭廟圓立方澤明堂五郊封禪大雩出宮行事正旦受朝及臨軒拜王公皆服衮冕之服還宮及齋則服通天冠藉田則冠冕璪十二旒佩蒼玉黃綬青帶青袜青舄拜陵則黑介幘白紗單衣釋奠則服通天金博山冠玄紗袍春分朝日則青紗朝服青舄秋分夕月則白紗朝服緇舄俱冠五梁進賢冠合朔服通天金博山冠絳紗袍季秋講武出征告廟冠武弁黃金附蟬左貂襜類宜社武弁朱衣纂殿升殿服通天金博山冠絳紗袍入溫涼室冠武弁右貂附蟬絳紗服征還飲至服通天冠廟中遣上將則衮冕還宮則通天金博山冠賞祖罰社則武弁左貂附蟬元日冬至大小會皆通天金博山冠四時改出官服通天冠並赤舄明堂則五時俱通天冠各以其色服東西堂舉哀服白帻天子六璽文曰皇帝行璽封常行詔勅則用之皇帝之璽賜諸王書則用之皇帝信璽下銅獸符發諸州征鎮兵下竹使符拜代徵召諸州刺史則用之並白玉爲之方一寸二分螭獸鈕天子行璽封拜外國則用之天子

禮儀志 三十五
之璽賜諸外國書則用之天子信璽發兵外國若徵召外國及有事鬼神則用之並黃金爲之方一寸二分螭獸鈕又有傳國璽白玉爲之方四寸螭獸鈕上交五蟠螭隱起烏篆書文曰受天之命皇帝壽昌凡八字在六璽外唯封禪以封石函又有督攝萬機印一鈕以木爲之長一尺二寸廣二寸五分背上爲鼻鈕鈕長九寸厚一寸廣七分腹下隱起篆書爲督攝萬機凡四字此印常在內唯以印籍縫用則左戶郎中度支尚書奏取印訖輸內

皇太子平冕黑介幘垂白珠九旒飾以三采玉以組爲纓色如其綬金璽朱綬四采赤黃縹紺綬朱質長二丈一尺三百二十首廣九寸小綬長三尺二寸與綬同色而首半之衣服同乘輿而九章絳紱佩瑜王玉具劔火珠標首絳袴袜赤烏非謁廟則不服未加元服則空頂黑介幘雙童髻雙王導中舍人執遠遊冠以從其遠遊三梁冠黑介幘翠綉纓絳紗袞卓緣中單黑烏大朝所服亦服進賢三梁冠黑介幘卓朝服絳緣中單玄烏爲官臣舉哀白恰單衣烏皮履未加元服則素服皇太子璽黃金爲之方一寸龜鈕文曰皇太子璽宮中大事用璽小事用門下典書坊印

諸公卿平冕黑介幘青珠為旒上公九三公八諸卿六以組為纓色如其綬衣皆玄上纁下三公山龍八章降皇太子一等九卿藻火六章唯郊祀天地宗廟服之遠遊三梁諸王所服其未冠則空頂黑介幘開國公侯伯子男及五等散爵未冠者通如之

進賢冠文官二品已上並三梁四品已上並兩梁五品已下流外九品已上皆一梁致事者通著委貌冠主兵官及侍臣通著武弁侍臣加貂璫御史大理著法冠諸謁者太子中導客舍人著高山冠宮門僕射殿門吏亭長太子率更寺宮門督太子內坊察非吏諸門吏等皆

著却非冠羽林武賁著鵠冠錄令已下尚書以上著納言幘又有赤幘卑賤者所服敕日蝕文武官皆免冠著赤介幘對朝服賤者平巾赤幘示威武以助於陽也止再亦服之請雨則服緇幘東耕則服青幘凡人則服綠幘

印綬二品已上並金章紫綬三品銀章青綬三品已上凡

官及中侍中省皆為印不為章四品得印者銀印青綬五品六品得印

者銅印墨綬四品已下凡是開國子男及五等散品名號侯皆為銀章不為印七品八

品九品得印者銅印黃綬金銀章印及銅印並方一寸皆龜鈕東西南北四藩諸國王章上藩用中金中藩用

下金下藩用銀並方寸龜鈕佐官唯公府長史尚書二
丞給印綬六品已下九品已上唯當曹爲官長者給印
餘自非長官雖位尊並不給

諸王纁朱綬四采赤黃纁紺純朱質纁文織長二丈一
尺二百四十首廣九寸開國郡縣公散郡縣公玄朱綬
四采玄赤纁紺朱質玄文織長一丈八尺百八十首廣
八寸開國縣侯伯散縣侯伯青朱綬四采青赤白纁朱
質青文織長一丈六尺百四十首廣七寸開國縣子男
散縣子男名號侯開國鄉男素朱綬三采青赤白朱質
白文織長一丈四尺百二十首廣六寸一品二品紫綬

三采紫黃赤純紫質長一丈八尺百八十首廣八寸三
品四品青綬三采青白紅純青質長一丈六尺百四十
首廣七寸五品六品墨綬二采青紺純紺質長一丈四
尺百首廣六寸七品八品九品黃綬二采黃白純黃質
長一丈二尺六十首廣五寸官品從第二已上小綬間
得施玉環凡綬先合單紡爲一絲絲四爲一扶扶五爲
一首首五成一文采純爲質首多者絲細首少者絲麤
官有綬者則有紛皆長八尺廣三寸各隨綬色若服朝
服則佩綬服公服則佩紛官無綬者不合佩紛
鞶囊二品已上金縷三品金銀縷四品銀縷五品六品

綵縷七八九品綵縷獸爪鞞官無印綬者並不合佩鞞
囊及爪

一品玉具劔佩山玄王二品金裝劔佩水蒼王三品及
開國子男五等散品名號侯雖四五品並銀裝劔佩水
蒼王侍中已下通直郎已上陪位則像劔帶真劔者入
宗廟及升殿若在仗內皆解劔一品及散郡公開國公
侯伯皆雙佩二品三品及開國子男五等散品名號侯
皆隻佩綬亦如之

百官朝服公服皆執手板尚書錄令僕射吏部尚書手
板頭復有白筆以紫皮裹之名曰笏朝服綬紫荷錄令

左僕射左荷右僕射吏部尚書右荷七品已上文官朝
服皆簪白筆正王公侯伯子男卿尹及武職並不簪朝
服冠幘各一絳紗單衣白紗中單皐領袖皐襪革帶曲
領方心蔽膝白筆烏袜兩綬劔佩簪導鈎鰈爲具服七
品已上服也公服冠幘紗單衣深衣革帶假帶履袜鈎
鰈謂之從省服八品已下流外四品已上服也

流外五品已下九品已上皆著襦衣爲公服
皇后璽綬佩同乘輿假髻步搖十二釧八雀九華助祭
朝會以禕衣祠郊禘以褕狄小宴以闕狄親蠶以鞠衣
禮見皇帝以展衣宴居以祿衣六服俱有蔽膝織成緹

帶皇太后皇后璽並以白玉爲之方一寸二分螭獸鈕
文各如其號璽不行用有令則太后以宮名衛尉印皇
后則以長秋印

內外命婦從五品已上蔽髻唯以鑲數花釵多少爲品
秩二品已上金玉飾三品已下金飾內命婦左右昭儀
三夫人視一品假髻九鑲金章紫綬服褕翟雙佩山玄
玉九嬪視三品五鑲蔽髻銀章青綬服鞠衣佩水蒼玉
世婦視四品三鑲銀印青綬服展衣無佩八十一御女
視五品一鑲銅印墨綬服祿衣又有官人女官服制第
二品七鑲蔽髻服闕翟三品五鑲鞠衣四品三鑲展衣
五品一鑲祿衣六品祿衣七品青紗公服俱大首髻八
品九品俱青紗公服偏髻髻

皇太子妃璽綬佩同皇太子假髻步搖九鑲服褕翟從
蠶則青紗公服

皇太子妃璽以黃金方一寸龜鈕文曰皇太子妃之璽
若有封書則用內坊印

郡長公主公主王國太妃妃纁朱綬髻章服佩同內命
婦一品郡長君七鑲蔽髻玄朱綬闕翟章佩與公主同
郡君縣主佩水蒼玉餘與郡長君同太子良娣視九嬪
服縣主青朱綬餘與良娣同女侍中五鑲假金印紫綬

服鞠衣佩水蒼玉縣君銀章青朱綬餘與女侍中同太子孺人同世婦太子家人子同御女鄉主鄉君素朱綬佩水蒼玉餘與御女同外命婦章印綬佩皆如其夫若夫假章印綬佩妻則不假一品二品七鎮蔽髻服闕翟三品五鎮服鞠衣四品三鎮服展衣五品一鎮服祿衣內外命婦宮人女官從蠶則各依品次還著蔽髻皆服青紗公服如外命婦綬帶鞶囊皆准其夫公服之例百官之母詔加太夫人者朝服公服各與其命婦服同後周設司服之官掌皇帝十二服祀昊天上帝則蒼衣蒼冕祀東方上帝及朝日則青衣青冕祀南方上帝則朱衣朱冕祭皇地祇祀中央上帝則黃衣黃冕祀西方上帝及夕月則素衣素冕祀北方上帝祭神州社稷則玄衣玄冕享先皇加元服納后朝諸侯則象衣象冕十有二章日月星辰山龍華蟲六章在衣火宗彝藻粉米黼黻六章在裳凡十二等享諸先帝大貞於龜食三老五更享諸侯耕籍則服袞冕自龍已下凡九章十二等宗彝已下五章在衣藻火已下四章在裳衣重宗彝祀星辰祭四望視朔大射饗羣臣巡犧牲養國老則服山冕八章十二等衣裳各四章衣重火與宗彝羣祀視朝臨太學入道法門宴諸侯與羣臣及燕射養庶老適諸

侯家則服鷩冕七章十二等衣三章裳四章衣重三章

衮山鷩三冕皆裳重黼黻俱十有二等通以升龍為領

標冕通十有二旒巡兵即戎則服韋弁謂以韎韋為弁

又以為裳衣也田獵行鄉畿則服皮弁謂以鹿子皮為

弁白布衣而素裳也皇帝凶服斬衰父母之喪上下達其弔服

錫衰以哭三公總衰以哭諸侯皆十五升抽其半錫者浣其布不浣其縷哀在

細者浣其縷不浣其布哀在外也疑衰以哭大夫十四升皆素弁如爵弁之數

環經一服凡大疫大荒大災則素服縞冠凡疫病荒饑年災水旱也

諸公之服九一曰方冕二曰衮冕九章宗彝已上五章

在衣藻已下四章在裳三曰山冕八章衣裳各四章衣

重宗彝為九等四曰鷩冕七章衣三章裳四章衣重火

與宗彝五曰火冕六章衣裳各三章衣重宗彝及藻裳

重黻六曰毳冕五章衣三章裳二章衣重藻粉米裳重

黼黻山冕已下俱九等皆以山為領標冕俱九旒七曰

韋弁八曰皮弁九曰玄冠

諸侯服自方冕而下八無衮冕山冕八章衣裳各四章

鷩冕七章衣三章裳四章衣重宗彝火冕六章衣裳各

三章衣重藻裳重黻毳冕五章衣三章裳二章衣重粉

米裳重黼黻鷩冕已下俱八等皆以華蟲為領標冕俱

八旒

萬曆二十六年刊 禮記卷之二十一 禮記卷之二十一

諸伯服自方冕而下七又無山冕鷩冕七章衣三章裳
四章火冕六章衣裳各三章裳重黼毳冕五章衣三章
裳二章裳重黼黻火冕已下俱七等皆以火爲領標冕
俱七旒

諸子服自方冕而下六又無鷩冕火冕六章衣裳各三
章毳冕五章衣三章裳二章裳重黻毳冕已下俱六等
皆以宗彝爲領標冕俱六旒

諸男服自方冕而下五又無火冕毳冕五章衣三章裳
二章以藻爲領標冕五旒

三公之服九一曰祀冕二曰火冕六章衣裳各三章衣
重宗彝與藻裳重黻二曰毳冕五章衣三章裳二章衣
重藻與粉米裳重黼黻四曰藻冕四章衣裳俱二章衣
重藻與粉米裳重黼黻五曰繡冕三章衣一章裳二章
衣重粉米裳重黼黻俱九等皆以宗彝爲領標六曰爵
弁七曰韋弁八曰皮弁九曰玄冠

三孤之服自祀冕而下八無火冕毳冕五章衣三章裳
二章衣重粉米裳重黼黻藻冕四章衣裳各二章衣重
藻與粉米裳重黼黻俱八等皆以藻爲領標繡冕三章
衣一章裳二章衣重粉米裳重黼黻爲八等

公卿之服自祀冕而下七又無毳冕藻冕四章衣裳各

二章衣重粉米裳重黼黻為七等皆以粉米為領標各
七繡冕三章衣一章裳二章衣重粉米裳重黼黻為七
等

上大夫之服自祀冕而下六又無藻冕繡冕三章衣一
章裳二章衣重粉米裳重黼為六等

中大夫之服自祀冕而下五又無皮弁繡冕三章衣一
章裳二章衣重粉米為五等

下大夫之服自祀冕而下四又無爵弁繡冕三章衣一
章裳二章衣重粉米為四等

士之服三一日祀弁二日爵弁三日玄冠玄冠皆玄衣其裳上士以

玄中士以黃下士雜裳謂前玄後黃也庶士之服一玄冠庶士庶人在官

緇衣後令文武俱著常服冠形如魏帽無簪有纓其凶

服皆與庶人同其弔服諸侯於其卿大夫錫衰同姓總
衰於士疑衰其當事則弁經否則皮弁公孤卿大夫之
弔服錫衰弁經皮弁亦如士之弔服疑衰素裳當事弁
經否則徒弁

皇后衣十二等其翟衣六從皇帝祀郊禘享先皇朝皇

太后則服翬衣素質五色祭陰社朝命婦則服翟衣青質五色祭

羣小祀受獻璽則服鷩衣赤衣采桑則服鳩衣黃衣從皇帝
見賓客聽女教則服鵠衣白色食命婦歸寧則服翺衣玄衣

俱十有二等以翬雉爲領禕各有二臨婦學及法道門
命婦有時見命婦則蒼衣春齋及祭還則青衣夏齋及
祭還則朱衣采桑齋及采桑還則黃衣秋齋及祭還則
素衣冬齋及祭還則玄衣自青衣而下其領禕以相生
之色

諸公夫人九服其翟衣雉皆九等俱以翟雉爲領禕各
九自翟衣已下五曰翟衣鶩衣鶩衣鶩衣并朱衣
黃衣素衣玄衣而九自朱衣而下其領禕亦同用相生
之色

諸侯夫人自鶩而下八其翟衣雉皆八等使以鶩雉爲
領禕無翟衣

諸伯夫人自鶩而下七其翟衣雉皆七等俱以鶩雉爲
領禕又無鶩衣

諸子夫人自鶩而下六其翟衣俱以鶩雉爲領禕又無
鶩衣

諸男夫人自翬而下五其翟衣雉皆五等俱以翬雉爲
領禕又無鶩衣

三妃三公夫人之服九一曰鶩衣二曰鶩衣三日翬衣
四曰青衣五曰朱衣六曰黃衣七曰素衣八曰玄衣九
曰鶩衣似髮華皆九樹其雉衣亦皆九等以鶩雉爲領禕

各九

三妃三孤之內子自鶡衣而下八雉衣皆八等以鶡雉為領標各八

六嬪六卿之內子自翊衣而下七雉衣皆七等以翊雉為領標各七

上媛上大夫之孺人自青衣而下六

中媛中大夫之孺人自朱衣而下五

下媛下大夫之孺人自黃衣而下四

御婉士之婦人自素衣而下三

中宮六尚一曰緇衣其色赤而微玄諸命秩之服曰公服其餘

常服曰私衣皇后華皆有十二樹諸侯之夫人亦皆以

命數為之節三妃三公夫人已下又各依其命一命再

命者又俱以三為節

皇后及諸侯夫人之服皆為履三妃三公夫人已下翟

衣則為其餘皆履為履各如其裳之色

皇后之凶服斬衰齊衰降旁暮已下帶服為妃嬪三公

之夫人孤卿內子之喪錫衰錫者十五升去其半無事其纓有事其布哀在內也

為諸侯夫人之喪總衰總亦十五升去其半有事其纓無事其布衰在外也為媛

御婉及大夫孺人士之婦人之喪疑衰十四升皆吉筭疑於吉

無首象筭去首飾太陰虧則素服蕩一八下之陰事諸侯之夫人及三

死與三公之夫人已下凶事則五衰自總已上皆服之其弔諸

侯夫人於卿之內子大夫孺人錫衰於已之同姓之臣

總衰於士之婦人疑衰皆言笄無首其三妃已下及媛

三公夫人已下及孺人其弔服錫衰御婉及士之婦人

弔服疑衰疑衰同笄九族已下皆言笄

韞皇帝三章龍火山諸侯二章去龍卿大夫一章以山

皆織絲以成之

皇帝八璽有神璽有傳國璽皆寶而不用神璽明受之於天傳國璽

明受之於通皇帝負宸則置神璽於筵前之右置傳國璽於

筵前之左又有六璽其一白帝行璽封命諸侯及三公

用之其二皇帝之璽與諸侯及三公書用之其三皇帝

信璽發諸夏之兵用之其四天子行璽封命蕃國之君

用之其五天子之璽與蕃國之君書用之其六天子信

璽徵蕃國之兵用之六璽皆白玉為之方一寸五分高

寸螭獸鈕皇后璽文曰皇后之璽白玉為之方寸五分

高寸麟鈕三公諸侯皆金印方寸二分高八分龜鈕七

命已上銀四命已上銅皆龜鈕三命已上銅印銅鼻其

方皆寸其高六分文曰某公官之印

皇帝之組綬以蒼以青以赤以黃以白以玄以纁以緋

以紫以緗以碧以綠十有二色諸公九色自黃以下諸

萬曆二十六年刊

侯八色自白以下諸伯七色自玄以下諸子六色自纁
已下諸男五色自紅已下三公之綬如諸公三孤之綬
如諸侯六卿之綬如諸伯上大夫之綬如諸子中大夫
之綬如諸男下大夫綬自紫已下士之綬自緞已下其
璽印之綬亦如之

保定四年百官始執笏常服上焉宇文護始命袍加下
欄宣帝卽位受朝於路門初服通天冠絳紗袍羣臣皆
服漢魏衣冠大象元年制冕二十四旒衣服以二十四
章爲準二年下詔天臺近侍及宿衛之官皆著五色衣
以錦綺績繡爲緣名曰品色衣有大禮則服冕內外命
婦皆執笏其拜俛伏方興

隋書卷十一終

隋書卷十二

禮儀志第七

太尉揚州都督監脩國史上柱國趙國公臣長孫無忌等奉勅撰

皇明朝列大夫國子監祭酒臣方從哲

勅重較刊承直郎國子監司業臣楊道賓等奉

皇明朝列大夫國子監祭酒臣吳士元

勅重修承德郎司業仍加俸一級臣黃錦等奉

禮儀七

高祖初卽位將改周制乃下詔曰宣尼制法云行夏之時乘殷之輅弈葉共遵理無可革然三代所尚衆論多端或以爲所建之時或以爲所感之瑞或當其行色因以從之今雖夏數得天歷代通用漢尚於赤魏尚於黃

驪馬玄牲已弗相踵明不可改建寅歲首常服於黑朕
初受天命赤雀來儀兼姬周已還於茲六代三正廻復
五德相生總以言之並宜火色垂衣已降損益可知尚
色雖殊常兼前代其郊丘廟社可依袞冕之儀朝會衣
裳宜盡用赤昔丹鳥木運姬有大白之旂黃星土德曹
乘黑首之馬在祀與戎其尚恒異今之戎服皆可尚黃
在外常所著者通用雜色祭祀之服須合禮經宜集通
儒更可詳議太子庶子攝太常少卿裴正奏曰竊見後
周制冕加爲十二既與前禮數乃不同而色應五行又
非典故謹案三代之冠其名各別六等之冕承用區分

璪玉五采隨班異飾都無迎氣變色之文唯月令者起
于秦代乃有青旂赤王白駱黑衣與四時而色變全不
言於弁冕五時冕色禮既無文稽於正典難以經證且
後魏已來制度咸闕天興之歲草創繕脩所造車服多
參胡制故魏收論之稱爲違古是也周氏因襲將爲故
事大象承統咸取用之輿輦衣冠甚多迂怪今皇隋革
命憲章前代其魏周輦輅不合制者已勅有司盡令除
廢然衣冠禮器尚且兼行乃有立夏袞衣以赤爲質迎
秋平冕用白成形既越典章須革其謬謹案續漢書禮
儀志云立春之日京都皆著青衣秋夏悉如其色逮于

魏晉迎氣五郊行禮之人皆同此制考尋故事唯幘從
衣色今請冠及冕色並用玄唯應著幘者任依漢晉制
曰可於是定令採用東齊之法乘輿衮冕垂白珠十有
二旒以組爲纓色如其綬黻纁充耳玉笄玄衣纁裳衣
山龍華蟲火宗彝五章裳藻粉米黼黻四章衣重宗彝
裳重黼黻爲十二等衣標領織成升龍白紗內單黼領
青標襪裾革帶玉鈎釧大帶素帶朱裏紕其外上以朱
下以綠鞞隨裳色龍火山三章鹿盧玉具劔火珠鏢首
白玉雙佩玄組雙大綬六采玄黃赤白縹綠純玄質長
二丈四尺五百首廣一尺小雙綬長二尺六寸色同大
綬而首半之間施三玉環朱鞞赤烏烏加金飾祀圓丘
方澤感帝明堂五郊雩禘封禪朝日夕月宗廟社稷藉
田廟遣上將征還飲至元服納后正月受朝及臨軒拜
王公則服之通天冠加金博山附蟬十二首施珠翠黑
介幘玉簪導絳紗袞深衣製白紗內單阜領標襪裾絳
紗蔽膝白假帶方心曲領共革帶劔佩綬烏與上同若
未加元服則雙童髻空頂黑介幘雙玉導加寶飾朔日
受朝元會及冬會諸祭還則服之武弁金附蟬平巾幘
餘服具服講武出征四時蒐狩大射禡類宜社賞祖罰
社纂嚴則服之黑介幘白紗單衣烏皮履拜陵則服之

白紗帽白練裘襦烏皮履視朝聽訟及宴見賓客皆服之白恰白紗單衣烏皮履舉哀則服之

神璽寶而不用受命璽封禪則用之皇帝行璽封命諸侯及三師三公則用之皇帝之璽賜諸侯及三師三公書則用之皇帝信璽徵諸夏兵則用之天子行璽封命蕃國之君則用之天子之璽賜蕃國之君書則用之天子信璽徵蕃國兵則用之常行詔勅則用內史門下印皇帝臨臣之喪三品已上服錫衰五等諸侯總衰四品已下疑衰

皇太子袞冕垂白珠九旒青纁充耳犀笄玄衣纁裳衣

山龍華蟲火宗彝五章裳藻粉米黼黻四章織成爲之白紗內單黼領青襪襪裙革帶金鈎釧大帶素帶不朱裏亦紕以朱綠黻隨裳色火山二章玉具劔火珠鏤首瑜玉雙佩朱組雙大綬四采赤白縹紺純朱質長一丈八尺三百二十首廣九寸小雙綬長二尺六寸色同大綬而首半之間施二玉環朱鞮赤舄以金飾侍從皇帝祭祀及謁廟元服納妃則服之

遠遊三梁冠加金附蟬九首施珠翠黑介幘纓翠綉犀簪導絳紗袞白紗內單阜領襪襪裙白假帶方心曲領絳紗蔽膝鞮舄其革帶劔佩綬與上同未冠則雙童髻

空頂黑介幘雙玉導加寶飾謁廟還宮元日朔日入朝
釋奠則服之

遠遊冠公服絳紗單衣革帶金鈎釶假帶方心紛長六
尺四寸廣二寸四分色同其綬金縷鞞囊鞮履五日常
朝則服之

白恰單衣烏皮履為宮臣舉哀則服之

皇太子璽宮內大事用之小事用左右庶子印

皇太子臨弔三師三少則錫衰宮臣四品已上總衰五
品已下疑衰

袞冕青珠九旒以組為纓色如其綬自此已下服九章

同皇太子王國公開國公初受冊執贄入朝祭親迎則
服之三公助祭者亦服之

鷩冕侯入旒服七章衣華蟲火宗彝三章裳藻粉米黼

黻四章八旒者侯伯初受冊執贄入朝祭親迎則服之

毳冕子六旒服五章衣宗彝藻粉米三章裳黼黻二章

六旒者子男初受冊執贄入朝祭親迎則服之

繡冕三品七旒服三章七旒者衣粉米一章為三

旒者減黼一重五正三品已下從五品已上助祭則服之

自王公已下服章皆繡為之祭服冕皆簪導青纁充耳

玄衣纁裳白紗內單黼領黼冕已下青標襪裙章帶鈎

解大帶

王三公及公侯伯子男素帶不朱裏皆紕其外上以朱下以綠正三品已下從五品已上素帶

紕其垂外以玄內以黃組約皆用青組

朱鞞

凡鞞皆隨裳色袞鷲毳

劍佩

綬鞞赤舄

爵弁玄纓無旒從九品已上助祭則服之其制服簪導

玄衣纁裳無章白絹內單青領標襪裙革帶大帶

練帶紕其

垂內外以緇組約用青組

爵鞞鞞赤履武弁平巾幘諸武職及侍臣

通服之侍臣加金璫附蟬以貂為飾侍左者左珥右者

右珥

遠遊三梁冠黑介幘諸王服之

進賢冠黑介幘文官服之從三品已上三梁從五品已

上兩梁流內九品已上一梁

法冠一名獬豸冠鐵為柱其上施珠兩枚為獬豸角形

法官服之

高山冠謁者服之

却非冠門者及禁防伺非服之

黑介幘平巾黑幘應服者並上下通服之庖人則綠幘

白帔白紗單衣烏皮履上下通服之

季貌冠未冠則雙童髻空頂黑介幘皆深衣青領烏皮

履國子太學四門生服之

朝服

亦名具服

冠幘簪導白筆絳紗單衣白紗內單阜領袖

早襪革帶鉤假帶曲領方心絳紗蔽膝鞮烏綬劍佩從
五品已上陪祭朝饗拜表凡大事則服之六品已下從
七品已上去劍佩綬餘並同自餘公事皆從公服亦名從省
服

冠幘簪導絳紗單衣革帶鉤假帶方心鞮履紛鞞囊
從五品已上服之

絳禱衣公服

禱衣即單衣之不垂胡也袖狹形直如禱內餘同從省

流外五品已

下九品已上服之

綬王纁朱綬四采赤黃纁紺純朱質纁文織長一丈八
尺二百四十首廣九寸公玄朱綬四采玄赤纁紺純朱

質玄文織長一丈八尺二百四十首廣九寸侯伯青朱
綬四采青赤白纁純朱質青文織長一丈六尺百八十
首廣八寸子男素朱綬三采青赤白純朱質白文織成
一丈四尺百四十首廣七寸正從一品綠纁綬四采綠
紫黃赤純綠質長一丈八尺二百四十首廣九寸從三
品已上紫綬三采紫黃赤純紫質長一丈六尺百八十
首廣八寸銀青光祿大夫朝議大夫及正從四品青綬
三采青白紅純青質長一丈四尺百四十首廣七寸正
從五品墨綬二采青紺純紺質長一丈二尺百首廣六
寸自王公已下皆有小雙綬長二尺六寸色同大綬而

首半之正從一品施二玉環已下不合其有綬者則有
紛皆長六尺四寸廣二寸四分各隨其綬色

鞶囊二品已上金縷三品金銀縷四品及開國男銀縷
五品綵縷官無綬者則不合劔佩一品及五等諸侯並
佩山玄玉五品已上佩水蒼玉

年高致仕及以理去官被召謁見皆服前官從省服州
郡秀孝試見之日皆假進賢一梁冠絳公服

隱居道素之士被召入謁見者黑介幘白單衣革帶烏
皮履

左右衛左右武衛左右武侯大將軍領左右大將軍並

武弁絳朝服劔佩綬侍從則平巾幘紫衫大口袴褶金
玳瑁裝兩襠甲唯左右武衛大將軍執赤檀杖左右衛
左右武衛左右武侯將軍領左右將軍左右監門衛將
軍太子左右衛左右宗衛左右內等率左右監門郎將
及諸副率並武弁絳朝服劔佩綬侍從則平巾幘紫衫
大口袴金裝兩襠甲唯左右武衛將軍太子左右宗衛
率執白檀杖

直閣將軍直寢直齋太子直閣武弁絳朝服劔佩綬侍
從則平巾幘絳衫大口袴褶銀裝兩襠甲

皇后首飾花十二樹皇太子妃公主王妃三師三公及

公夫人一品命婦並九樹侯夫人二品命婦並八樹伯

夫人三品命婦並七樹子夫人世婦及皇太子昭訓四

品已上官命婦並六樹男夫人五品命婦五樹女御及

皇太子良娣三樹自皇后已下小花並如大花之數并兩博鬢也

皇后祿衣深青織成爲之爲單翟之形素質五色十二等青紗內單黼領羅縠

標襪蔽膝隨裳色用翟爲章三等大帶隨衣色朱裏紕其外上以朱錦下以綠錦紐約用青

組以青衣革帶青鞵烏烏加金飾白玉佩玄組綬章采尺寸與乘輿同

祭及朝會凡大事則服之

鞠衣黃羅爲之應服者皆同其蔽膝大帶及衣革帶烏隨衣

色餘與禕衣同唯無雉親蠶則服之應服者皆以助祭

青衣青羅爲之制與鞠衣同去花大帶及佩綬以禮見

皇帝則服之

朱衣緋羅爲之制如青衣宴見賓客則服之

皇太后服與皇后同皇太后璽不行用若封令書則用

宮官之印

皇后璽不行用若封令書則用內侍之印

皇太子妃褕翟青織成爲之爲搖翟之形青質五色九等青紗內單黼領羅

縠標襪蔽膝隨衣色以搖翟爲章三等大帶隨衣色下朱裏紕其外上以朱錦下以綠錦紐

約用以青衣革帶青鞵烏烏加金飾瑜王佩純朱綬章采尺寸與皇

太子助祭朝會凡大事則服之亦有鞠衣

同

皇太子妃璽不行用若封書則用典內之印

公主王妃三師三公及公侯伯夫人服褕翟

繡為之公主王妃三

師三公及公夫人為九等侯夫人八等伯夫人七等

助祭朝會凡大事則服之亦

有鞠衣

子男夫人服闕翟

緋羅為之刻赤繪為翟形不繡級助於服上子夫人六等男夫人五等

祭朝會凡大事則服之亦有鞠衣

諸王公侯伯子男之母與妃夫人同其郡縣君各視其

夫及子若郡縣君品高及無夫子者准品

嬪及從三品已上官命婦青服

制與褕翟同青羅為之唯無雉

助祭朝

會凡大事則服之亦有鞠衣

世婦及皇太子昭訓從五品已上官命婦服青服助祭

從蠶朝會凡大事則服之

女御及皇太子良媛朱服

制與青服同去佩綬

助祭從蠶朝會凡

大事則服之

六尚朱絲布公服助祭從蠶朝會凡大事則服之

六司六典及皇太子三司三典三掌青紗公服助祭從

蠶朝會凡大事則服之

佩綬嬪同九卿世婦及皇太子昭訓同五品公主王妃

同諸王三師三公五等國夫人及從五品已上官命婦

皆准其夫無夫者准品定令訖

高祖元正朝會方御通天服郊丘宗廟盡用龍袞衣大
裘毳襦皆未能備至平陳得其器物衣冠法服始依禮
具然皆藏御府弗服用焉百官常服同於匹庶皆著黃
袍出入殿省高祖朝服亦如之唯帶加十三環以爲差
異蓋取於便事及大業元年煬帝始詔吏部尚書牛弘
工部尚書宇文愷兼內史侍郎虞世基給事郎許善心
儀曹郎袁朗等憲章古制創造衣冠自天子逮于胥卑
服章皆有等差若先所有者則因循取用弘等議定乘
輿服合八等焉

大裘冕之制案周禮大裘之冕無旒三禮衣服圖大裘
而冕王祀昊天上帝及五帝之服至秦除六冕唯留玄
冕漢明帝永平中方始創制董巴志云漢六冕同制皆
闊七寸長尺二寸前圓後方於是遂依此爲大裘冕制
青衣朱裏不施旒纁不通於下其大裘之服案周官注
羔裘也其制准禮圖以羔正黑者爲之取同色繪以爲
領袖其裳用纁而無章飾絳鞅赤舄祀圓丘感帝封禪
五郊明堂雩禘皆服之

袞冕之制案禮玉藻十有二旒大戴禮云冕而加旒以
蔽明也琇纁塞耳以蔽聽也又禮舍文嘉前後遂延不
視邪也加以黹纁不聽讒也三王之冕旣不通制故夫

子云行夏之時服周之冕今以采綖貫珠爲旒十二邃
延者出冕前後而下垂之旒齊於髀續齊於耳組爲纓
玉笄導其爲服之制案釋名云袞卷也謂畫龍於上也
是時虞世基奏曰後周故事升日月於旌旗乃闕三辰
而章無十二但有山龍華蟲作繪宗彝藻火粉米黼黻
乃與三公不異開皇中就裏欲生分別故衣重宗彝裳
重黼黻合重二物以就九章爲十二等但每一物上下
重行袞服用九鷲服用七今重此三物乃非典故且周
氏執謙不敢負於日月所以綴此三象唯施太常天王
袞衣章乃從九但天子譬日德在照臨辰爲帝位月主
正后召此三物合德齊明自古有之理應無惑周執謙
道殊未可依重用宗彝又乘法服今准尚書予欲觀古
人之服日月星辰山龍華蟲作會宗彝藻火粉米黼黻
絺繡具依此於左右髀上爲日月各一當後領下而爲
星辰又山龍九物各重行十二又近代故實依尚書大
傳山龍純青華蟲純黃作會宗彝純黑藻純白火純赤
以此相間而爲五采鄭玄議已自非之云五采相錯非
一色也今並用織成於繡五色錯文准孔安國衣質以
玄加山龍華蟲火宗彝等並織成爲五物裳質以纁加
藻粉米黼黻之四衣裳通數此爲九章兼上三辰而備

十二也衣襟領上各帖升龍漢晉以來率皆如此既是先王法服不可乖於夏制徵而用之理將爲允墨勅曰可承以單衣又案董巴輿服志宗廟冕服云絳領袖爲內單衣又車服雜記曰天子釋奠郊祭而單衣以絳緣今用白紗爲內單黼領絳襟青裾及襪革帶玉鉤鑿大帶朱裏紕其外紐約用組上加朱鞞又案說文鞞鞞也所以蔽前禮記曰有虞氏鞞夏后氏山殷火周龍章鄭玄曰冕之鞞也舜始作之以尊祭服禹湯至周增以文飾禮記曰君朱鞞鄭曰鞞象裳色今依白武通注以蔽裳前上闊一尺象天數也下闊二尺象地數也長三尺

象三才也加龍章山火以備三代之法也於是制衮冕之服玄衣纁裳合九章爲十二等白紗內單黼領青襟襪革帶玉鉤鑿大帶鞞鹿盧玉具劔火珠鏢首白玉雙佩玄組大小綬朱鞞赤舄舄飾以金宗廟社稷籍田方澤朝日夕月遣將授律征還飲至加元服納后正冬受朝臨軒拜爵皆服之

通天冠之制案董巴志冠高九寸形正豎頂少邪却後乃下直爲鐵卷梁前有高山故禮圖或謂之高山冠也晉起居注成帝咸和五年制詔殿內曰平天通天冠並不能佳可更脩理之雖在禮無文故知天子所冠其來

久矣又徐氏輿服注曰通天冠高九寸黑介幘金博山
徐爰亦曰博山附蟬謂之金顏今制依此不通於下獨
天子元會臨軒服之其服絳紗袞深衣製白紗內單阜
領襍裾襪絳紗蔽膝白假帶方心曲領其劔佩綬烏革
帶皆與上同元冬饗會諸祭還則服之四時視朔則內
單領襪各隨其方色唯秋方色白以綠代之

遠遊冠之制案漢雜事曰太子諸王服之故淮南子曰
楚莊王冠通梁組纓注云通梁遠遊也晉令皇太子諸
王給遠遊冠徐氏雜注曰天子雜服遠遊五梁太子諸
王三梁董巴志曰制如通天有展筭橫之幘上今制依

此天子加金博山九首施珠翠黑介幘金緣以承之翠
綉纓犀簪導太子親王加金附蟬宗室王去附蟬並不
通於庶姓其乘輿遠遊冠服白紗單衣承以裘襦烏皮
履拜山陵則服之

武弁之制案徐爰宋志謂籠冠是也禮圖曰武士服之
董巴輿服志云諸常侍內常侍加黃金附蟬尾謂之
惠文冠今制天子金博山三公已上玉冠枝四品已上
金枝侍臣加附蟬眊豐貂文官七品已上眊白筆八品
已下及武官皆不眊筆其乘輿武弁之服衣裳綬如通
天之服講武出征四時蒐狩大射禡類宜社賞祖罰社

纂嚴皆服之

弁之制案五經通義高五寸前後玉飾詩云璿弁如星董巴曰以鹿皮爲之尚書顧命四人綦弁執戈故知自天子至于執戈通貴賤矣魏臺訪議曰天子以五采玉珠十二飾之命參准此通用焉漆紗而爲之天子十二琪皇太子及一品九琪二品八琪三品七琪四品六琪五品五琪六品已下無琪唯文官服之不通武職案禮圖有結纓而無笄導少府少監何稠請施象牙簪導詔許之弁加簪導自茲始也乘輿鹿皮弁服緋大襦白羅裙金烏皮履革帶小綬長二尺六寸色同大綬而首半

之間施三玉環白玉佩一隻視朝聽訟則服之凡弁服自天子已下內外九品已上弁皆以烏爲質並衣袴褶五品已上以紫六品已下以絳宿衛及在仗內加兩襠騰蛇絳構衣連裳典謁贊引流外冗吏通服之以纓後制鹿皮弁以賜近臣

帽古野人之服也董巴云上古穴居野處衣毛帽皮以此而言不施衣冠明矣案宋齊之間天子宴私著白高帽士庶以烏其制不定或有卷荷或有下裙或有紗高屋或有烏紗長耳後周之時咸著突騎帽如今胡帽垂裙覆帶蓋索髮之遺象也又文帝項有瘤疾不欲人見

每常著焉相魏之時著而謁帝故後周一代將爲雅服
小朝公宴咸許戴之開皇初高祖常著烏紗帽自朝貴
已下至于冗吏通著入朝今復制白紗高屋帽其服練
裙襦烏皮履宴接賓客則服之

白紗案傅子魏太祖以天下凶荒資財乏匱擬古皮弁
裁縑帛以爲之蓋自魏始也梁令天子爲朝臣等舉哀
則服之今亦准此其服白紗單衣承以裙襦烏皮履舉
哀臨喪則服之

幘案董巴云起於秦人施於武將初爲絳帟以表貴賤
焉至漢孝文時乃加以高顏孝元帝額有壯髮不欲人
見乃始進幘又董偃召見綠幘傅鞞東觀記云詔賜段
熲赤幘大冠一具故知自上已下至于卑隸及將帥等
皆通服之今天子畋獵御戎文官出遊田里武官自一
品已下至于九品并流外吏色皆同烏厨人以綠卒及
馭人以赤舉輦人以黃駕五輅人逐其車色承遠遊進
賢者施以掌導謂之介幘承武弁者施以笄導謂之平
巾其乘輿黑介幘之服紫羅褶南布袴玉梁帶紫絲鞋
長鞞靴畋獵豫遊則服之

皇太子服六等袞冕九旒朱組纓青纒琬耳犀簪導紺
衣纁裳去日月星辰爲九章白紗內單黼黻領青襍襪

裾革帶金鉤釐大帶鞞二章玉具劔侍從祭祀及謁廟
加元服納妃則服之據晉咸寧四年故事衣色用玄改
用紺舊章用織成降以繡玉具劔故事以火珠鏢首改
以白珠開皇中皇太子冕同天子貫白珠及仁壽元年
煬帝爲太子以白珠太逼表請從青珠於是太子衮冕
與三公王等皆青珠九旒旒短不及臑降天子二寸

遠遊冠金附蟬加寶飾珠翠九首珠纓翠綏犀簪導絳
紗袞白紗內單阜領標襪裾白假帶方心曲領絳紗蔽
膝鞞烏革帶劔佩綬同衮冕未冠則雙童髻空頂黑介
幘雙玉導加寶飾珠翠二首謁廟還元日朔旦入朝釋

奠則服之始後周採用周禮皇太子朝賀皆衮冕九章
服開皇初自非助祭皆冠遠遊冠至此牛弘奏云皇太
子冬正大朝請服衮冕帝問給事郎許善心曰太子朝
謁著遠遊冠有何典故對曰晉令皇太子給五時朝服
遠遊冠至宋泰始六年更議儀注儀曹郎丘仲起議案
周禮公自衮冕已下至卿大夫之玄冕皆其朝聘之服
也伏尋古之公侯尚得服衮以入朝見况皇太子儲副
之尊謂宜式遵盛典服衮朝賀兼左丞陸澄議服冕以
朝實著經典自秦除六冕之制後漢始備古章魏晉以
來非祀宗廟不欲令臣下服於衮冕位爲公者必加侍

禮儀志 卷之二十七
官故太子入朝因亦不著但承天作副禮絕羣后宜遵前王之令典革近代之陋制皇太子朝請服冕自宋以下始定此儀至梁簡文之爲太子嫌於上逼還冠遠遊下及於陳皆依此法後周之時亦言服衮入朝至于開皇復遵魏晉故事臣謂衮冕之服章玉雖差一日而觀頗欲相類臣子之道義無上逼故晉武帝太始三年詔太宰安平王孚著侍內之服四年又賜趙燕樂安王等散騎常侍之服自斯以後台鼎貴臣並加貂璫武弁故皇太子遂著遠遊謙不逼尊於理爲允帝曰善竟用開皇舊式

遠遊三梁冠從省服絳紗單衣革帶金鈎鰈假帶方心佩一隻紛長六尺四寸闊二寸四分色同於綬金縷鞞囊白鞞烏皮履金飾五日常朝則服之鹿皮弁九琪服絳羅襦白羅裙革帶履鞞佩紛如從省服在宮聽政則服之

平巾黑幘玉冠枝金花飾犀簪導紫羅褶南布袴玉梁帶長鞞靴侍從田狩則服之

白帟素單衣烏皮履爲宮臣舉哀弔喪則服之

諸王三公已下爲服之制衮冕九章服三公攝祭及諸王初受冊贊入朝助祭親迎則服之綬各依其色

禮儀志 卷之三
驚冕案禮圖王祭先公及卿之服天子九旒用玉二百一十六侯伯服以助祭七旒用玉八十新制依此服七章三品及公侯助祭則服之

毳冕案禮圖王祀四望山川之服天子七旒用玉百六十八子男服以助祭五旒用玉五十新制依此服五章四品及伯助祭則服之

繡冕案禮圖王者祭社稷五祀之服天子五旒用玉百二十孤卿服以助祭四旒用玉三十二新制依此服三章五品及子男助祭則服之

玄冕案禮圖王祭羣小祀及視朝服天子四旒用玉三十二諸侯服以祭其宗廟三旒用玉十八新制依此服三章通給庶姓一品已下五品已上自製于家祭其私廟三品省衣粉米加重裳黼黻加二重四品減黼一重五品減黻一重禮自玄冕以上加旒一等天子祭祀節級服之

開皇以來天子唯用衮冕自驚之下不施於尊具依前式而六等之冕皆有黹纁黃緜爲之其大如橘自皇太子以下三犀導青纓爵弁案董巴志同於爵形一名冕有收持笄所謂夏收殷皐者也祠天地五郊明堂雲翹舞人服之禮云朱干玉戚冕而舞大夏此之謂也禮圖

云士助君祭服之色如爵頭無旒有纁新制依此角爲
簪導衣青裳纁並纁無章六品已下皆通服之

遠遊冠服王所服也衣裳內單如皇太子佩山玄王金
章龜鈕宋孝建故事亦謂之璽今文曰印又並歸於官
府身不自佩例以銅易之大綬四采小綬同色施二玉
環玉具劔烏皮烏加金飾唯帝子宗室封國王者服
之

進賢冠案漢官云平帝元始五年令公卿列侯冠三梁
二千石兩梁千石以下一梁梁別貴賤自漢始也董巴
釋曰如緇布冠文儒之服也前高七寸而却後高三寸

而立王莽之時以幘承之新制依此內外文官通服之
三品已上三梁五品已上兩梁九品已上一梁用明尊
卑之等也其朝服亦名具服絳紗單衣白紗內單玄領
裾襪袖革帶金鈎鰈假帶曲領方心絳紗蔽膝白鞵烏
皮烏雙佩綬如遠遊之色白一品已下五品已上衣服
盡同而綬依其品陪祭朝饗拜表凡大事皆服之六品
七品去劔佩綬八品九品去白筆內單而用履代烏其
五品已上一品已下又有公服亦名從省服並烏皮履
去曲領內單白筆蔽膝開皇故事亦去鞞囊佩綬何稠
講去大綬而偏垂一小綬綴於獸頭鞞囊獨一隻佩正

當於後詔從之一品已下五品已上同

高山冠案董巴志云一曰側注謁者僕射之所服也胡伯始以為齊王冠秦滅齊以賜謁者傅子曰魏明帝以高山冠似通天乃毀變其形除去卷笏令如介幘幘上加物以象山峯行人使者通皆服之新制參用其事形如進賢於冠前加三峯以象魏制謁者大夫已下服之梁依其品

解豸冠案禮圖曰法冠也一曰柱後惠文如淳注漢官曰惠蟬也細如蟬翼今御史服之禮圖又曰解豸冠高五寸秦制也法官服之董巴志曰解豸神羊也蔡邕云

如麟一角應劭曰古有此獸主觸不直故執憲者為冠以象之秦滅楚以其冠賜御史此即是也開皇中御史戴却非冠而無此色新制又以此而代却非御史大夫以金治書侍御史以犀侍御史已下用麤羊角獨御史司隸服之

巾案方言云巾趙魏間通謂之承露郭林宗傳曰林宗嘗行遇雨巾沾角折又袁紹戰敗幅巾渡河此則野人及軍旅服也制有二等今高人道士所著是林宗折角庶人農夫常服是袁紹幅巾故事用全幅阜而向後襍髮俗人謂之襍頭自周武帝裁為四脚今通於貴賤矣

簪導案釋名云簪建也所以建冠於髮也一曰笄笄係也所以拘冠使不墜也導所以導櫛鬢髮使入巾幘之裏也今依周禮天子以玉笄而導亦如之又史記曰平原君誇楚爲玳瑁簪班固與弟書云今遺仲升以黑犀簪士燮集云遣功曹史貢皇太子通天犀導故知天子獨得用玉降此通用玳瑁及犀今並准是唯并用白牙笄導焉

貂蟬案漢官侍內金蟬左貂金取剛固蟬取高潔也董巴志曰內常侍右貂金璫銀附蟬內書令亦同此今宦者去貂內史令金蟬右貂納言金蟬左貂開皇時加散騎常侍在門下者皆有貂蟬至是罷之唯加常侍聘外國者特給貂蟬還則輸納於內省

白筆案徐氏雜注云古者貴賤皆執笏有事則書之故常簪筆今之白筆是遺象也魏略曰明帝時大會而史官筆今文官七品已上通毳之武職雖貴皆不毳也
纓案儀禮曰天子朱纓諸侯丹組纓今冕天子已下皆朱纓又尉繚子曰天子玄纓諸侯素纓別尊卑也今不用素並從冠色焉

佩案禮天子佩白玉董巴司馬彪云君臣佩玉尊卑有序所以章德也今參用杜夔之法天子白玉太子瑜玉

王山玄王自公已下皆水蒼玉

綬案禮天子玄組綬侯伯朱組綬大夫純組綬世子綦
組綬漢官云蕭何爲相國佩綠綬公侯紫卿二千石青
令長于石黑今大抵准此天子以雙綬六采玄黃赤白
標綠純玄質長二丈四尺五百首闊一尺雙小綬長二
尺六寸色同大綬而首半之間施四玉環開皇用三今
加一皇太子朱雙綬四采赤白縹紺純朱質長一丈八
尺三百二十首闊九寸雙小綬長一尺六寸色同大綬
而首半之間施三玉環開皇用二今加一三公綠綬綬
四采綠黃縹紫純綠質黃文織之長一丈八尺二百四

十首闊九寸與親王綬俱施二玉環諸王縹朱綬四采
赤黃縹紺純朱質縹文織之長一丈八尺二百四十首
闊九寸公玄朱綬四采赤縹玄紺純朱質玄文織之長
一丈八尺二百四十首闊九寸侯伯青朱綬四采青赤
白縹純朱質青文織長一丈六尺百八十首闊八寸子
男素朱綬三采青赤白純朱質素文織之長一丈四尺
百四十首闊七寸二品已上縹紫綬四采縹紫赤黃純
紫質縹文織之長一丈四尺百四十首闊八寸三品紺
紫綬四采紫紺黃縹純紫質紺文織之長一丈六尺百
八十首闊八寸四品青綬三采青白紅純青質長一丈

四尺百四十首闊七寸五品墨綬二采青紺絕結質長一丈二尺百二十首闊六寸自王公已下皆有小綬二枚色同大綬而首半之正從一品施二玉環凡有綬者皆有紛並長六尺四寸闊二寸四分隨於綬色

鞶囊案禮男鞶革女鞶絲東觀書詔賜鄧遵獸頭鞶囊一枚班固與弟書遺仲升獸頭旁囊金錯鉤也古佩印皆貯懸之故有囊稱或帶於旁故班氏謂爲旁囊綬印鈕也今雖不佩印猶存古制有佩綬者通得佩之無佩則不今採梁陳東齊制品極尊者以金織成二品以上服之次以銀織成三品已上服之下以綬織成五品已

上服之分爲三等

革帶案禮博二寸禮圖曰璫綴於革帶阮諶以爲有章印則於革帶佩之東觀記楊賜拜太常詔賜白所著革帶故知形制尊卑不別今博三寸半加金縷鰐螭娘鉤以相拘帶自大裘至于小朝服皆用之

劔案漢自天子至于百官無不佩刀蔡謨議云大臣優禮皆劔履上殿非侍臣解之蓋防刃也近代以木未詳所起東齊著令謂爲象劔言象於劔周武帝時百官燕會並帶刀升座至開皇初因襲舊式朝服登殿亦不解焉十二年因蔡徵上事始制凡朝會應登殿坐者劔履

俱脫其不坐者勅召奏事及須升殿亦就席解劔乃登
納言黃門內史令侍郎舍人既夾侍之官則不脫其劔
皆真刃非假既合舊典弘制依定又准晉咸康元年定
令故事自天子已下皆衣冠帶劔今天子則玉具火珠
鏢首餘皆玉鏢首唯侍臣帶劔上殿自王公已下非殊
禮引升殿皆就席解而後升六品以下無佩綬者皆不
帶

曲領案釋名在單衣內襟領上橫以雍頸七品已上有
內單者則服之從省服及八品已下皆無

珽案禮天子搢珽方正於天下也又五經異義天子笏
曰珽珽直無所屈也今制准此長尺二寸方而不折以
球玉爲之

笏案禮諸侯以象大夫魚須文竹士以竹本象可也凡
有指畫於君前受命書於笏笏畢用也五經要義曰所
以記事防忽忘禮圖云度二尺有六寸中博二寸其殺
六分去一晉宋以來謂之手板此乃不經今還謂之笏
以法古名自西魏以降五品已上通用象牙六品已下
兼用竹木

履舄案圖云複下曰舄單下曰履夏葛冬皮近代或以
重皮而不加木失於乾腊之義闕取乾腊之理以木重

底冕服者色赤冕衣者色烏履同闕色諸非侍臣皆脫而升殿凡烏唯冕服及具服著之履則諸服皆用唯褶服以靴靴胡履也取便於事施於戎服

諸建華鷓鴣冠委貌長冠樊噲却敵巧士術氏却非等前代所有皆不採用

皇后服四等有褱衣鞠衣青服朱服

褱衣深青質織成領袖文以蠶翟五采重行十二等首飾花十二鈿小花毵十二樹并兩博鬢素紗內單黼領羅縠襍色皆以朱蔽膝隨裳色以緞為緣用翟三章大帶隨衣裳飾以朱綠之錦青緣革帶青鞵烏鳥以金飾白玉佩玄組綬章采尺寸同於乘輿祭及朝會凡大事皆服之

鞠衣黃羅為質織成領袖小花十二樹蔽膝革帶及烏隨衣色餘准褱衣親蠶服也

青服去花大帶及佩綬金飾履禮見天子則服之

朱服制如青服宴見賓客則服之

有金璽盤螭鈕文曰皇后之璽冬正大朝則并黃琮各以笥貯進於座隅

皇太后服同於后服而貴妃以下並亦給印

貴妃德妃淑妃是為三妃服褱翟之衣首飾花九鈿并

二博鬢金章龜鈕文從其職紫綬一百二十首長一丈七尺金縷織成獸頭鞞囊佩于寘玉

順儀順容順華脩儀脩容脩華充儀充容充華是爲九嬪服闕翟之衣首飾花八鈿并二博鬢金章龜鈕文從其職紫綬一百首長一丈七尺金縷織成獸頭鞞囊佩采瓊玉

婕妤銀縷織成獸頭鞞囊首飾花七鈿他如嬪服

美人才人服鞠衣首飾花六鈿并二博鬢銀印珪鈕文從其職青綬八十首長一丈六尺綵縷織成獸爪鞞囊佩水蒼玉

寶林服展衣首飾花五鈿并二博鬢銀印環鈕文如其職艾綬八十首長一丈六尺鞞囊佩玉同於婕妤

承衣乃人采女皆服祿衣無印綬參准宋泰始四年及梁陳故事增損用之

皇太子妃服褕翟之衣青質五采織成爲搖翟以備九章首飾花九鈿并二博鬢金璽龜鈕文如其職素紗內單黼領羅襪色皆用朱蔽膝二章大帶同禕衣青綠革帶朱鞞青烏烏加金飾佩瑜玉纁朱綬一百六十首長二丈獸頭鞞囊凡大禮見皆服之唯侍親桑則用鞠衣之服花鈿佩綬與褕衣同准宋孝建二年故事而增

損之

良娣鞠衣之服銀印珪鈕文如其職佩采瓊玉青綬八
十首長一丈六尺獸爪鞶囊餘同世婦

保林八子展衣之服銅印環鈕文如其職佩水蒼玉艾
綬八十首長一丈六尺獸爪鞶囊自良娣等准宋大明
六年故事而損益之

諸王太妃妃長公主公主三公夫人一品命婦褕翟之
服繡爲九章首飾花九鈿佩山玄玉獸頭鞶囊綬同夫
色

公夫人縣主二品命婦亦服褕翟繡爲八章首飾八鈿
侍從親桑同用鞠衣自此之下佩皆水蒼玉

侯伯夫人三品命婦亦服褕翟繡爲七章首飾七鈿
子夫人四品命婦服闕翟之衣刻赤繪爲翟綬於服上
以爲六章首飾六鈿

男夫人五品命婦亦服闕翟之衣刻繪爲翟綬於服上
以爲五章首飾五鈿若當從侍親桑皆同鞠衣議既定
帝幸脩文殿覽之乃令何稠起部郎閭毗等造樣上呈
二年摠了始班行焉軒冕之盛貫古今矣三年正月朔
旦大陳文物時突厥染干朝見慕之請襲冠冕帝不許
明日幸左光祿大夫禡但特勤阿史那職御左光祿大

夫特勤阿史那伊順右光祿大夫意大利發史蜀胡悉等並拜表固請衣冠帝大悅謂弘等曰昔漢制初成方知天子之貴今衣冠大備足致單于解辮此乃卿等功也弘愷善心世基何稠閻毗等賜帛各有差並事出優厚是後師旅務殷車駕多行幸百官行從唯服袴褶而軍旅間不便至六年後詔從駕涉遠者文武官等皆戎衣貴賤異等雜用五色五品已上通着紫袍六品已下兼用緋綠胥吏以青庶人以白屠商以皂士卒以黃

卓彼上天宮室混成玄戈居其左上將居其右弧矢揚威羽林置陳易曰天垂象聖人則之昔軒轅氏之有天
下也以師兵爲營衛降至三代其儀大備西漢武帝每上甘泉則列鹵簿車千乘騎萬匹其居前殿則植戟懸楯以戒不虞其所由來者尚矣

梁武受禪于齊侍衛多循其制正殿便殿閣及諸門上下各以直閣將軍等直領又置刀鈔御刀御楯之屬直御左右兼有御仗鋌稍赤斃角抵勇士青斃衛仗長刀刀劔細仗羽林等左右二百七十六人以分直諸門行則儀衛左右又有左右夾轂蜀客楯劔格獸羽林八從遊盪十二不從遊盪直從細射廉察刀戟腰弩大弩等隊凡四十九隊亦分直諸門上下行則量爲儀衛東西

掖端大司馬東西華承明大通等門又各二隊及防殿
三隊雖行幸不從又有八馬遊盪馬左右夾轂左右馬
百騎等各二隊及騎官閱武馬容雜伎馬容及左右馬
騎直隊行則侍衛左右分爲警衛車駕晨夜出入及涉
險皆作函鹵簿應宿衛軍騎皆執兵持滿各當其所保
護方 天明及度險乃奏解函搥鼓而依常列乘輿行
則有大駕法駕小駕大駕以郊饗上天臨馭九代法駕
以祭方澤祀明堂奉宗廟藉千畝小駕以敬園陵親蒐
狩大駕則公卿奉引大將軍驂乘太僕馭法駕小駕皆
侍中驂乘奉車郎馭公卿不引其餘行幸送往勞旋則
乘仗近讌則隊仗三駕法天二仗法地其動也參天而
兩地也陳氏承梁亦無改革

齊文宣受禪之後警衛多循後魏之儀及河清中定令
宮衛之制左右各有羽林郎十二隊又有持鈇隊鉞槩
隊長刀隊細仗隊楯鍛隊雄戟隊格獸隊赤氍隊角抵
隊羽林隊步遊盪隊馬遊盪隊又左右各武賁十隊左
右翊各四隊又步遊盪馬遊盪左右各三隊是爲武賁
又有直從武賁左右各六隊在左者爲前駟隊在右者
爲後拒隊又有募員武賁隊強弩隊左右各一隊在左
者皆左衛將軍總之在右者皆右衛將軍總之以備警

衛其領軍中領將軍侍從出入則著兩襠甲手執檀杖左右衛將軍則兩襠甲手執檀杖侍從左右則有千牛備身左右備身刀劍備身之屬兼有武威熊渠鷹揚等備身三隊皆領左右將軍主之宿衛左右而戎服執仗兵有斧鉞弓箭刀稍旌旗皆囊首五色節文旒悉赭黃天子御正殿唯大臣夾侍兵仗悉在殿下郊祭鹵簿則督將平巾幘緋衫甲大口袴

後周警衛之制置左右宮伯掌侍衛之禁各更直於內小宮伯貳之臨朝則分在前侍之首並金甲各執龍環金飾長刀行則夾路車左右中侍掌御寢之禁皆金甲

左執龍環右執獸環長刀並飾以金次左右侍陪中侍之後並銀甲左執鳳環右執麟環長刀次左右前侍掌御寢南門之左右並銀甲左執師子環右執象環長刀次左右後侍掌御寢北門之左右並銀甲左執犀環右執兕環長刀左右騎侍立於寢之東西階並銀甲左執羆環右執熊環長刀十二人兼執師子形楯列左右侍之外自左右侍以下刀並以銀飾左右宗侍陪左右前侍之後夜則衛於寢庭之中皆服金塗甲左執豹環右執貔環長刀並金塗飾十二人兼執師子形楯列於左右騎侍之外自左右中侍已下皆行則兼帶黃弓矢巡

田則常服帶短刀如其長刀之飾左右庶侍掌非皇帝所御門閣之禁並服金塗甲左執解豸環右執獬豸環長劍並金飾十二人兼執師子彤楯列於左右宗侍之外行則兼帶皓弓矢左右勳侍掌陪左右庶侍而守出入則服金塗甲左執吉良環右執淨環長劍十二人兼執師子彤楯列於左右庶侍之外行則兼帶盧弓矢巡田則與左右庶侍俱常服佩短劍如其長劍之飾諸侍官大駕則俱侍中駕及露寢半之小駕三分之一左右武伯掌內外衛之禁令兼六率之士皇帝臨軒則備三仗於庭服金甲執金鉤杖立於殿上東西階之側行則列兵於帝之左右從則服金甲被繡袍左右小武伯各二人戴之服執同於武伯分立於大武伯下及露門之左右塾行幸則加錦袍左右武賁率掌武賁之士其隊器服皆玄以四色飾之各總左右持鈸之隊皇帝臨露寢則立於左右三仗第一行之南北出則分在隊之先後其副率貳之左右旅賁率掌旅賁士其隊器服皆青以朱爲飾立於三仗第二行之南北其副率貳之左右射聲率掌射聲之士其器服皆朱以黃爲飾立於三仗第三行之南北其副率貳之左右驍騎率掌驍騎之士器服皆黃以皓爲飾立於三仗第四行之南北其副率貳

之左右羽林率掌羽林之士其隊器服皆皓以玄爲飾
立於三仗第五行之南北其副率貳之左右遊擊率掌
遊擊之士其器服皆玄以青爲飾其副率貳之武賁已
下六率通服金甲師子文袍執銀鈿檀杖副率通服金
甲獸文袍各有倅長帥長相次陪列行則引前倅長通
服銀甲豹文袍帥長通服銀甲鷓文袍自副率已下通
執獸環銀飾長刀凡大駕則盡行中駕及露寢則半之
小駕半中駕常行軍旅則衣色尚烏

高祖受命因周齊宮衛微有變革戎服臨朝大仗則領
左右大將軍二人分在左右廂左右直寢左右直齋左
右直後千牛備身左右備身等夾侍供奉於左右及坐
後左右衛大將軍左右直閣將軍以次左右衛將軍各
領儀刀爲十二行內四行親衛行別以大都督領次外
四行勳衛以帥都督領次外四行翊衛以都督領行各
二人執金花師子楯獲刀一百四十人分左右帶橫刀
後監門直長十二人左青龍旗右白獸旗左右武衛開
府各領三仗六行在大仗內行別六十人大都督一人
領之帥都督一人後之大駕則執黃麾仗其次戟二十
四左青龍幢右白獸幢罕畢各一鈿金二十四金節十
二道蓋獸又絳引幡朱幢爲持鈿前隊應蹕大都督二

人領之在御前橫街南左右武衛大將軍領大仗左右
廂各六行行別三百六十人大都督一人領之及大業
四年煬帝北巡出塞行宮設六合城方一百二十步高
四丈二尺六合以木爲之方六尺外面一方有板離合
爲之塗以青色壘六板爲城高三丈六尺上加女牆板
高六尺開南北門又於城四角起樓敵二門觀門樓檻
皆丹青綺畫又造六合殿千人帳載以槍車車載六合
三板其車輪解合交叉卽爲馬槍每車上張幕幕下張
平一弩傳矢五人更守兩車之門施車輪馬槍皆外其
轅以爲外圍次內布鐵菱次內施螿韃每一螿韃中施
弩牀長六尺闊三尺牀枕陛插鋼錐皆長五寸謂之蝦
鬚皆施機關張則錐皆外向其牀上施旋機弩以繩連
弩機人從外來觸繩則弩機旋轉向觸所而發其外又
以矧周圍行宮二丈一鈴一柱柱舉矧去地二尺五寸
當行宮南北門施槌磬連矧以機發之有人觸矧則衆
鈴發響槌擊兩磬以知所警名爲擊警八年征遼又造
鉤陳以木板連如帳子張之則綺文卷之則直焉帝御
營與賊城相對夜中設六合城周迴八里城及女垣合
高十仞上布甲士立仗建旗又四隅有闕面別一觀觀
下開三門其中施行殿殿上容侍臣及三衛仗合六百

人一宿而畢望之若真高麗旦忽見謂之爲神焉

隋書卷十二終

隋書卷十三

音樂志第八

大尉揚州都督監脩國史上柱國趙國公臣長孫無忌等奉勅撰

皇明朝列大夫國子監祭酒臣方從哲

勅重較刊 承道郎國子監司業臣楊道實等奉

皇明朝列大夫國子監祭酒臣吳上元

勅重修 承德郎司業仍加俸一級臣黃錦等奉

音樂上

夫音本乎太始而生於人心隨物感動播於形氣形氣既著協於律呂宮商克諧名之爲樂樂者樂也聖人因百姓樂已之德正之以六律文之以五聲詠之以九歌舞之以八佾實升平之冠帶王化之源本記曰感於物

而動故形於聲夫人者兩儀之播氣而性情之所起也
恣其流涵往而不歸是以五帝作樂三王制禮標舉人
倫削平淫放其用之也動天地感鬼神格祖考諸邦國
樹風成化象德昭功啓萬物之情通天下之志若夫升
降有則宮商垂範禮踰其制則尊卑乖樂失其序則親
疎亂禮定其象樂平其心外敬內和合情飾貌猶陰陽
以成化若日月以爲明也記曰大夫無故不撤懸士無
故不撤琴瑟聖人造樂導迎和氣惡情屏退善心興起
伊耆有葦籥之音伏犧有網罟之詠葛天八閔神農五
弦事與功偕其來已尚黃帝樂曰咸池帝嚳曰六英帝
顓頊曰五莖帝堯曰大章帝舜曰簫韶禹曰大夏殷湯
曰護武王曰武周公曰勺教之以風賦弘之以孝友大
禮與天地同節大樂與天地同和禮意風猷樂情膏潤
傳曰如有王者必世而後仁成康化致升平刑厝而不
厝也古者天子聽政公卿獻詩秦人有作罕聞斯道漢
高祖時叔孫通爰定篇章周祀宗廟唐山夫人能楚聲
又造房中之樂武帝裁音律之響定郊丘之祭頗雜謳
謠非全雅什漢明帝時樂有四品一曰大予樂郊廟上
陵之所用焉則易所謂先王作樂崇德殷薦之上帝以
配祖考者也二曰雅頌樂辟雍饗射之所用焉則孝經

所謂移風易俗莫善於樂者也三曰黃門鼓吹樂天子
宴羣臣之所用焉則詩所謂坎坎鼓我蹲蹲儻我者也
其四曰短簫鏡歌樂軍中之所用焉黃帝時岐伯所造
以建武揚德風敵勵兵則周官所謂王師大捷則令凱
歌者也又採百官詩頌以爲登歌十月吉辰始用蒸祭
董卓之亂正聲咸蕩漢雅樂郎杜夔能曉樂事八音七
始靡不兼該魏武平荊州得夔使其刊定雅律魏有先
代古樂自夔始也自此迄晉用相因循永嘉之寇盡淪
胡羯於是樂人南奔穆皇羅鐘磬符堅北敗孝武獲登
歌晉氏不綱魏圖將霸道武克中山太武平統萬或得
其宮懸或收其古樂于時經營是迫雅器斯寢孝文頗
爲詩歌以勗在位謠俗流傳布諸音律大臣馳騁漢魏
旁羅來齊功成奮豫代有制作莫不各揚廟舞自造郊
歌宣暢功德輝光當世而移風易俗浸以陵夷梁武帝
本自諸生博通前載未及下車意先風雅爰詔凡百各
陳所聞帝又自糾擿前違裁成一代周太祖發跡關隴
躬安戎狄羣臣請功成之樂式遵周舊依一材而命管
承六典而揮文而下武之聲豈姬人之唱登歌之奏叶
鮮卑之音情動於中亦人心不能已也昔仲尼返魯風
雅斯正所謂有其藝而無其時高祖受命惟新八州同

貫制氏全出於胡人迎神猶帶於邊曲及顏何驟請頗涉雅音而繼想聞韶去之彌遠若夫二南斯理八風揚節順序旁通妖淫屏棄宮徵流唱翱翔率舞弘仁義之道安性命之真君子益厚小人無悔非大樂之懿其孰能與於此者哉是以舜詠南風而虞帝昌紂歌北鄙而殷王滅大樂不紊則王政在焉故錄其不相因襲以備于志周官大司樂一千三百三十九人漢郊廟及武樂三百八十人煬帝矜奢頗玩淫曲御史大夫裴蘊揣知帝情奏括周齊梁陳樂工子弟及人間善聲調者凡三百餘人並付太樂倡優優雜咸來萃止其哀管新聲淫弦巧奏皆出鄴城之下高齊之舊曲云

梁氏之初樂緣齊舊武帝思弘古樂天監元年遂下詔訪百寮曰夫聲音之道與政通矣所以移風易俗明貴辨賤而韶護之稱空傳咸英之實靡託魏晉以來陵替滋甚遂使雅鄭混淆鐘石斯謬天人缺九變之節朝醮失四懸之儀朕昧旦坐朝思求厥旨而舊事匪存未獲釐正寤寐有懷所爲歎息卿等學術通明可陳其所見於是散騎常侍尚書僕射沈約奏答曰竊以秦代滅學樂經殘亡至于漢武帝時河間獻王與毛生等共採周官及諸子言樂事者以作樂記其內史丞王定傳授常

山王禹劉向校書得樂記二十三篇與禹不同向別錄有樂歌詩四篇趙氏雅琴七篇師氏雅琴八篇龍氏雅琴百六篇唯此而已晉中經簿無復樂書別錄所載已復亡逸案漢初典章滅絕諸儒捃拾溝渠牆壁之間得片簡遺文與禮事相關者卽編次以爲禮皆非聖人之言月令取呂氏春秋中庸表記防記緇衣皆取子思子樂記取公孫尼子檀弓殘雜又非方幅典誥之書也禮旣是行已經邦之切故前儒不得不補綴以備事用樂書事大而用緩自非逢欽明之主制作之君不見詳議漢氏以來主非欽明樂旣非人臣急事故言者寡陛下

以至聖之德應樂推之符實宜作樂崇德殷薦上帝而樂書淪亡尋案無所宜選諸生分令尋討經史百家凡樂事無大小皆別纂錄乃委一舊學撰爲樂書以起千載絕文以定大梁之樂使五英懷慙六莖興愧是時對樂者七十八家咸多引流略浩蕩其詞皆言樂之宜改不言改樂之法帝旣素善鍾律詳悉舊事遂自制定禮樂又立爲四器名之爲通通受聲廣九寸宣聲長九尺臨岳高一寸二分每通皆施三絃一曰玄英通應鐘絃用一百四十二絲長四尺七寸四分差強黃鐘絃用二百七十絲長九尺大呂絃用二百五十二絲長八尺四

寸三分差弱二曰青陽通太簇絃用二百四十絲長八
尺夾鐘絃用二百二十四絲長七尺五寸弱姑洗絃用
一百四十二絲長七尺一寸一分強三曰朱明通中呂
絃用一百九十九絲長六尺六寸六分弱蕤賓絃用一
百八十九絲長六尺三寸二分強林鐘絃用一百八十
絲長六尺四寸四曰白藏通夷則絃用一百六十八絲
長五尺六寸二分弱南呂絃用一百六十絲長五尺三
寸二分大強無射絃用一百二十九絲長四尺九寸一
分強因以通聲轉推月氣悉無差違而還相得中又制
爲十二笛黃鐘笛長三尺八寸大呂笛長三尺六寸大
簇笛長三尺四寸夾鐘笛長三尺二寸姑洗笛長三尺
一寸中呂笛長二尺九寸蕤賓笛長二尺八寸林鐘笛
長二尺七寸夷則笛長二尺六寸南呂笛長二尺五寸
無射笛長二尺四寸應鐘笛長二尺三寸用笛以寫通
聲飲古鐘王律并周代古鐘並皆不差於是被以八音
施以七聲莫不和韻是時北中郎司馬何佟之上言案
周禮王出入則奏王夏尸出入則奏肆夏牲出入則奏
昭夏今樂府之夏唯變王夏爲皇夏蓋緣秦漢以來稱
皇故也而齊氏仍宋儀注迎神奏昭夏皇帝出入奏永
至牲出入更奏引牲之樂其爲舛謬莫斯之甚請下禮

局改正周捨議以爲禮王入奏王夏大祭祀與朝會其
用樂一也而漢制皇帝在廟奏永至樂朝會之日別有
皇夏二樂有異於禮爲乖宜除永至還用皇夏又禮戶
出入奏肆夏賓入大門奏肆夏則所設唯在人神其與
迎牲之樂不可濫也宋季失禮頓虧舊則神入廟門遂
奏昭夏乃以牲牢之樂用接祖考之靈斯皆前代之深
疵當今所宜改也時議又以爲周禮云若樂六變天神
皆降神居上玄去還悅忽降則自至迎則無所可改迎
爲降而送依前式又周禮云若樂八變則地祇皆出可
得而禮地宜依舊爲迎神並從之又以明堂設樂大略

與南郊不殊惟壇堂異名而無就燎之位明堂則徧歌
五帝其餘同於郊式焉初宋齊代祀天地祭宗廟准漢
祠太一后土盡用宮懸又太常任昉亦據王肅議云周
官以六律五聲八音六舞大合樂以致鬼神以和邦國
以諧兆庶以安賓客以悅遠人是謂六同一時皆作今
六代舞獨分用之不感人心遂依肅議祀祭郊廟備六
代樂至是帝曰周官分樂饗祀虞書止鳴兩懸求之於
古無宮懸之議何事人禮縟事神禮簡也天子襲衮而
至敬不文觀天下之物無可以稱其德者則以少爲貴
矣大合樂者是使六律與五聲克諧八音與萬舞合節

耳豈謂致鬼神祇用六代樂也其後卽言分樂序之以祭以享此乃曉然可明肅則失其旨矣推檢載籍初無郊禋宗廟徧舞六代之文唯明堂位曰禘祀周公於太廟朱干玉戚冕而舞大武皮弁素積裼而舞大夏納夷蠻之樂於太廟言廣魯於天下也夫祭尚於敬無使樂繁禮黷是以季氏逮闇而祭繼之以燭有司跛倚其爲不敬大矣他日祭于路與焉質明而始晏朝而退孔子聞之曰誰謂由也不知禮乎若依肅議郊既有迎送之樂又有登歌各頌功德徧以六代繼之出入方待樂終此則乖於仲尼躋晏朝之意矣於是不備宮懸不徧舞

六代逐所應須卽設懸則非宮非軒非判非特宜以至敬所應施用耳宗廟省迎送之樂以其闕宮靈宅也齊永明中舞人冠幘並簪筆帝曰筆笏蓋以記事受言舞不受言何事簪筆豈有身服朝衣而足綦讌履於是去筆又晉及宋齊懸鐘磬大准相似皆十六架黃鐘之宮北方北面編磬起西其東編鐘其東衡大於罇不知何代所作其東罇鐘太簇之宮東方西面起北蕤賓之宮南方北面起東姑洗之宮西方東面起南所次皆如此面設建鼓於四隅懸內四面各有祝敵帝曰著晉宋史者皆言太元元嘉四年四廂金石大備今檢樂府止有

黃鐘姑洗蕤賓太簇四格而已六律不具何謂四廟備樂之文其義焉在於是除去衡鐘設十二罇鐘各依辰位而應其律每一罇鐘則設編鐘磬各一虞合三十六架植建鼓於四隅元正大會備用之乃定郊禋宗廟及三朝之樂以武舞爲大壯舞取易云大者壯也正大而天地之情可見也以文舞爲大觀舞取易云大觀在上觀天之神道而四時不忒也國樂以雅爲稱取詩序云言天下之事形四方之風謂之雅雅者正也止乎十二則天數也乃去階步之樂增撤食之雅焉衆官出入宋元徽二年儀注奏肅咸樂齊及梁初亦同至是改爲儗

雅取禮記司徒論選士之序者而升之學曰俊士也二郊太廟明堂三朝同用焉皇帝出入宋孝建二年秋起居注奏末至齊及梁初亦同至是改爲皇雅取詩皇矣上帝臨下有赫也二郊太廟同用皇太子出入奏胤雅取詩君子萬年永錫爾胤也王公出入奏寅雅取尚書周官三公弘化寅亮天地也上壽酒奏介雅取詩君子萬年介爾景福也食舉奏需雅取易雲上於天需君子以飲食宴樂也撤饌奏雍雅取禮記大饗客出以雍撤也並三朝用之牲出入宋元徽二年儀注奏引牲齊及梁初亦同至是改爲滌雅取禮記帝牛必在滌三月也

薦毛血宋元徽三年儀注奏嘉薦齊及梁初亦同至是
 改爲牲雅取春秋左氏傳牲牲肥膷也北郊明堂太廟
 並同用降神及迎送宋元徽三年儀注奏昭夏齊及梁
 初亦同至是改爲誠雅取尚書至誠感神也皇帝飲福
 酒宋元徽三年儀注奏嘉祚至齊不改梁初改爲永祚
 至是改爲獻雅取禮記祭統尸飲五洗王爵獻卿今之
 福酒亦古獻之義也北郊明堂太廟同用就燎位宋元
 徽三年儀注奏昭遠齊及梁不改就埋位齊永明六年
 儀注奏隸幽至是燎埋俱奏禮雅取周禮太宗伯以禮
 祀祀昊天上帝也其辭並沈約所製今列其歌詩二十

曲云

俊雅歌詩三曲四言

設官分職

髦俊攸俟

髦俊伊何

貴德尚齒

唐又咸事

周寧多士

區區衛國

猶賴君子

漢之得人

帝猷乃理

開我八襲

闢我九重

珩佩流響

纓紱有容

袞衣前邁

列辟雲從

義兼東序

事美西雍

分階等肅

異列齊恭

重列北上

分庭異陛

百司揚職

九賓相禮

齊宋舅甥

魯衛兄弟

思皇藹藹

羣龍濟濟

我有嘉賓 實惟愷悌

皇雅三曲五言

帝德實廣運 車書靡不賓 執瑁朝羣后

垂旒御百神 八荒重譯至 萬國婉來親

華蓋拂紫微 勾陳統大一 容裔被緹組

參差羅罕畢 星回照以爛 天行徐且謚

清蹕朝萬寓 端冕臨正陽 青紉黃金纒

袞衣文繡裳 既散華蟲采 復流日月光

胤雅一曲四言

自昔殷代 哲王迭有 降及周成 惟器是守

上天乃眷 大梁既受 灼灼重明 仰承元首

體乾作貳 命服斯九 置保置師 居前居後

前星北耀 克隆萬壽

寅雅一曲三言

禮莫違 樂具舉 延藩辟 朝帝所 執桓蒲

列齊莒 垂袞毳 紛容與 升有儀 降有序

齊簪紱 忘笑語 始於嚴 終酣醕

介雅三曲五言

百福四象初 萬壽三元始 拜獻惟袞職

同心協卿士 北極永無窮 南山何足擬

壽隨百禮洽 慶與三朝升 惟皇集繁祉
景福互相仍 申錫永無遺 穰簡必來應
百味既合馨 六飲莫能尚 玉壘信湛湛
金卮頗搖漾 敬舉發天和 祥祉流嘉贖
需雅八曲七言

實體平心待和味 庶羞百品多爲貴
或鼎或鼎宣九沸 楚桂胡鹽芼芳卉
加邊列俎彫且蔚 令芳甘旨庶且多
五味九變兼六和 圓案方文粲星羅
三危之露九期禾

皇舉斯樂同山河 玄芝碧樹壽華木
九州上腴非一族 用拂腥羶和九穀
終朝采之不盈掬 既甘且飫致遐福
人欲所大味爲先 興和盡敬咸在旃
碧鱗朱尾獻嘉鮮 紅毛綠翼隆輕翮
臣拜稽首萬斯年 擊鍾以俟惟大國
况乃御天流至德 侑食斯舉揚盛則
其禮不訾儀不忒 風猷所被深且塞

膳夫奉職獻芳滋 不麇不夭咸以時

調甘適苦別澁淄 其德不爽受福釐

於焉逸豫永無期

備味斯饗唯至聖 咸降人神禮為盛

或風或雅流歌咏 負鼎言歸啓殷命

悠悠四海同茲慶

道我六穗羅八珍 洪鼎自爨匪勞薪

荆包海物必來陳 滑甘滫瀡味和神

以斯至德被無垠

雍雅三曲四言

明明在上 其儀有序 終事靡訾 收劔撤俎

乃升乃降 和樂備舉 天德莫違 人謀是與

敬行禮達 茲焉讌語

我餽惟阜 我有孔庶 嘉味既克 食旨斯飫

屬厭無爽 冲和在御 擊壤齊歡 懷生等豫

蒸庶乃粒 寔由仁恕

百司警列 皇在在陛 既飫且酌 卒食成禮

其容穆穆 其儀濟濟 凡百庶僚 莫不愷悌

奄有萬國 抑由天啓

滌雅一曲四言

將脩盛禮 其儀孔熾 有膺斯牲 國門是置

不黎不瘠 靡誓靡忌 呈肌獻體 永言昭事

俯休皇德 仰綏靈志 百福具膺 嘉祥允洎

駿奔伊在 慶覃遐嗣

袞雅一曲四言

反本興敬 復古昭誠 禮容宿設 祀事孔明

華俎待獻 崇碑麗牲 充哉繭握 肅矣簪纓

其膏既啓 我豆既盈 庖丁遊刃 葛盧驗聲

多祉攸集 景福來并

威雅一曲三言 南郊啓神用

懷忽慌 瞻浩蕩 盡誠潔 致虔想 出杳冥

降無象 皇情肅 具僚仰 人禮盛 神途敞

僎明靈 申敬饗 感蒼極 洞玄壤

誠雅一曲三言 北郊迎神用

地德溥 崐丘峻 揚羽翟 鼓應棘 出尊祗

展誠信 招海瀆 羅岳鎮 惟福祉 咸昭晉

誠雅一曲四言 南北郊明堂太廟送神同用

我有明德 馨非稷黍 牲玉孔備 嘉薦惟旅

金懸宿設 和樂具舉 禮達幽明 敬行樽俎

鼓鐘云送 遐福是與

獻雅一曲四言

神宮肅肅 天儀穆穆 禮獻既同 膺此釐福

我有馨明 無愧史祝

禋雅一曲四言 就燎

紫宮昭煥 太一微玄 降臨下土 尊高上天

載陳珪璧 式備牲牲 雲孤清引 杳虛高懸

俯昭象物 仰致高煙 肅彼靈祉 咸達皇虔

禋雅一曲四言 就埋

盛樂斯舉 協徵調宮 靈饗慶洽 祉積化融

八變有序 三獻已終 坎牲瘞玉 酬德報功

振垂成呂 殺壤生風 道無虛致 事由感通

於皇盛烈 比祚華嵩

普通中薦蔬之後改諸雅歌勅蕭子雲製詞既無牲牢

遂省滌雅牲雅云

南郊舞奏黃鍾取陽始化也北郊舞奏林鍾取陰始化

也明堂宗廟所尚者 闕 蕤賓是為敬之名復有陰主之

義故同奏焉其南北郊明堂宗廟之禮加有登歌今又

列其歌詩一十八曲云

南郊皇帝初獻奏登歌二曲三言

噉既明 禮告成 惟聖祖 主上靈 爵已獻

壘又盈 息羽籥 展歌聲 儗如在 結皇情
禮容盛 樽俎列 玄酒陳 陶匏設 獻清旨
致虔潔 王既升 樂已闕 降蒼昊 垂芳烈
北郊皇帝初獻奏登歌二曲四言
方壇既埴 地祇已出 盛典弗僾 羣望咸秩
乃升乃獻 敬成禮卒 靈降無兆 神饗載謐
允矣嘉祚 其升如日
至哉坤元 寔惟厚載 躬茲奠饗 誠文顯晦
或升或降 搖珠動佩 德表成物 慶流皇代
純嘏不僾 祺福是賚

宗廟皇帝初獻奏登歌七曲四言

功高禮洽 道尊樂備 三獻具舉 百司在位
誠敬罔僾 幽明同致 茫茫億兆 無思不遂
蓋之如天 容之如地
殷兆玉筐 周始邠王 於赫文祖 基我大梁
肇土七十 奄有四方 帝軒百祀 人思未忘
永言聖烈 祚我無疆
有夏多罪 殷人塗炭 四海倒懸 十室思亂
自天命我 殲凶殄難 既躍乃飛 言登天漢
爰饗爰祀 福祿攸贊

犧象既飾 壘俎斯具 我鬱載馨 黃流乃注

峩峩卿士 駿奔是務 佩上鳴璫 纓還拂樹

悠悠億兆 天臨日煦

猗與至德 光被黔首 鑄鎔蒼昊 甄陶區有

肅恭三獻 對揚萬壽 比屋可封 含生無咎

匪徒七百 天長地久

有命自天 於皇后帝 悠悠四海 莫不來祭

繁祉具膺 八神聳衛 福至有兆 慶來無際

播此餘休 于彼荒裔

祀典昭潔 我禮莫違 八簋充室 六龍解駢

神宮肅肅 靈寢微微 嘉薦既饗 景福攸歸

至德光被 洪祚載輝

明堂徧歌五帝登歌五曲四言

歌青帝辭

帝居在震 龍德司春 開元布澤 含和尚仁

羣居既散 歲云陽止 飭農分地 人粒惟始

雕梁繡拱 丹楹玉墀 靈威以降 百福來綏

歌赤帝辭

炎光在離 火為威德 執禮昭訓 持衡受則

靡草既凋 溫風以至 嘉薦惟旅 時羞孔備

齊醜在堂 笙鏞在下 匪惟七百 無絕終始

歌黃帝辭

鬱彼中壇 含靈闡化 迴環氣象 輪無輟駕

布德焉在 四序將收 音宮數五 飯稷驂駟

宅屏居中 旁臨外宇 升為帝尊 降為神主

歌白帝辭

神在秋方 帝居西皓 允茲金德 裁成萬寶

鴻來雀化 參見火邪 幕無玄鳥 菊有黃華

載列笙磬 式陳彝俎 靈罔常懷 惟德是與

歌黑帝辭

德盛乎水 玄冥紀節 陰降陽騰 氣凝象閉

司智莅坎 駕鐵衣玄 祁寒坼地 晷度迴天

悠悠四海 駿奔奉職 祚我無疆 永隆人極

太祖太夫人廟舞歌

闕宮肅肅 清廟濟濟 於穆夫人 固天攸啓

祚我梁德 膺斯盛禮 文輓達嚮 重檐丹陛

節我俎彝 潔我粢盛 躬事奠饗 推尊盡敬

悠悠萬國 具承茲慶 大孝追遠 兆庶攸詠

太祖太夫人廟登歌

光流者遠 禮貴彌巾 嘉饗云備 盛典必陳

追養自本 立愛惟親 皇情乃慕 帝服來尊

駕齊六轡 旂耀三辰 感茲霜露 事彼冬春

以斯孝德 永被蒸民

大壯舞奏夷則大觀舞奏姑洗取其月王也二郊明堂
太廟三朝並同用今亦列其歌詩二曲云

大壯舞歌一曲四言

高高在上 實愛斯人 眷求聖德 大拯彝倫

率土方燎 如火在薪 悚悚黔首 暮不及晨

朱光啓耀 兆發穹旻 我皇鬱起 龍躍漢津

言屆牧野 電激雷震 闕鞞之甲 彭濮之人

或貔或武 漂杵浮輪 我邦雖舊 其命維新

六伐乃止 七德必陳 君臨萬國 遂撫八寅

大觀舞歌一曲四言

皇矣帝烈 大哉興聖 奄有四方 受天明命

居上不怠 臨下唯敬 舉無訾則 動無失正

物從其本 人遂其性 昭播九功 肅齊八柄

寬以惠下 德以為政 三趾晨儀 重輪夕映

棧壑忘阻 梯山匪負 如日有恒 與天無竟

載陳金石 式流舞詠 咸英韶夏 於茲比盛

相和五引

角引

萌生觸發 歲在春 咸池始奏 德尚仁

一 息憊以息 和且均

徵引

執衡司事 宅離方 潛潛夏日 火德昌

八音備舉 樂無彊

管引

八音資始 君五聲 與此和樂 感百精

優遊律呂 被咸英

商引

司秋紀兌 奏西音 激揚鍾石 和瑟琴

風流福被 樂愔愔

羽引

玄英紀運 冬冰折 物為音本 和且悅

窮高測深 長無絕

普通中薦蔬以後勅蕭子雲改諸歌辭為相和引則依五音宮商角徵羽為第次非隨月次也

舊三朝設樂有登歌以其頌祖宗之功烈非君臣之所獻也於是去之三朝第一奏相和五引第二衆官入奏俊雅第三皇帝入閣奏皇雅第四皇太子發西中華門

奏胤雅第五皇帝進王公發足第六王公降殿同奏寅
雅第七皇帝入儲變服第八皇帝變服出儲同奏皇雅
第九公卿上壽酒奏介雅第十太子入預會奏胤雅十
一皇帝食舉奏需雅十二撤食奏雍雅十三設大壯武
舞十四設大觀文舞十五設雅歌五曲十六設俳伎十
七設輦舞十八設鐸舞十九設拂舞二十設巾舞并白
紵二十一設舞盤伎二十二設舞輪伎二十三設刺長
追花幢伎二十四設受猾伎二十五設車輪折脰伎二
十六設長躡伎二十七設須彌山黃山三峽等伎二十
八設跳鈴伎二十九設跳劍伎三十設擲倒伎三十一
設擲倒案伎三十二設青絲幢伎三十三設一繖花幢
伎三十四設雷幢伎三十五設金輪幢伎三十六設白
獸幢伎三十七設擲躡伎三十八設獼猴幢伎三十九
設豕木幢伎四十設五案幢呪願伎四十一設辟邪伎
四十二設青紫鹿伎四十三設白武伎作訖將白鹿來
迎下四十四設寺子遵安息孔雀鳳凰文鹿胡舞登連
上雲樂歌舞伎四十五設緣高組伎四十六設變黃龍
弄龜伎四十七皇太子起奏胤雅四十八衆官出奏俊
雅四十九皇帝與奏皇雅自宋齊已來三朝有鳳凰嘶
書伎至是乃下詔曰朕君臨南面道風蓋闕嘉祥時至

爲媿已多假令巢侔軒閣集同昌戶猶當顧循寡德推而不居况於名實頓爽自欺耳日一元會太樂奏鳳凰嘶書伎至乃舍人受書升殿跪奏誠復興乎前代幸由自遠內省懷慙彌與事篤可罷之天監四年掌賓禮賀瑒請議皇太子元會出入所奏帝命別制養德之樂瑒謂宜名元雅迎送二傳亦同用之取禮一有元良萬國以貞之義明山賓嚴植之及徐勉等以爲周有九夏梁有十二雅此並則天數爲一代之曲今加一雅便成十三瑒又疑東宮所奏舞帝下其議瑒以爲天子爲樂以賞諸侯之有德者觀其舞知其德况皇儲養德春宮式瞻攸屬請宜備大壯大觀二舞以宣文武之德帝從之於是改皇太子樂爲元貞奏二舞是時禮樂制度粲然有序其後臺城淪沒簡文帝受制於侯景景以簡文女溧陽公主爲妃請帝及主母范淑妃宴于西州奏梁所常用樂景儀同索超世亦在宴筵帝潜然屑涕景興曰陛下何不樂也帝强笑曰丞相言索超世聞此以爲何聲景曰臣且不知何獨超世自此樂府不脩風雅咸盡矣及王僧辯破侯景諸樂並送荊州經亂工器頗闕元帝詔有司補綴纔備荊州陷沒周人不知采用工人有知音者並入關中隨例沒爲奴婢

鼓吹宋齊並用漢曲又充庭用十六曲高祖乃去四曲
留其十二合四時也更制新歌以述功德其第一漢曲
朱鷺改爲木紀謝言齊謝朓升也第二漢曲思悲翁改
爲賢首山言武帝破魏軍於司部肇王迹也第三漢曲
艾如張改爲桐柏山言武帝牧司王業彌章也第四漢
曲上之回改爲道亡言東昏喪道義師起樊鄧也第五
漢曲擁離改爲枕威言破加湖元勳也第六漢曲戰城
南改爲漢東流言義師克魯山城也第七漢曲巫山高
改爲鶴樓峻言平郢城兵威無敵也第八漢曲上陵改
爲昏主恣淫慝言東昏政亂武帝起義平九江姑蘇夫
破朱雀伐罪弔人也第九漢曲將進酒改爲石首局言
義師平京城仍廢昏定大事也第十漢曲有所思改爲
期運集言武帝應錄受禪德盛化遠也十一漢曲芳樹
改爲於穆言大梁闡運君臣和樂休祚方遠也十二漢
曲上邪改爲惟大梁言梁德廣運仁化洽也天監七年
將有事太廟詔曰禮云齋日不樂今親奉始出宮振作
鼓吹外可詳議八座丞郎參議請輿駕始出鼓吹從而
不作還宮如常儀帝從之遂以定制初武帝之在雍鎮
有童謠云襄陽白銅蹄反縛揚州兒識者言白銅謂馬
也白金色也及義師之興實以鐵騎揚州之士皆面縛

果如謠言故即位之後更造新聲帝自爲之詞三曲又
 令沈約爲三曲以被絃管帝既篤敬佛法又制善哉大
 樂大歡天道仙道神王龍王滅過惡除愛水斷苦轉等
 十篇名爲正樂皆述佛法又有法樂童子伎童子倚歌
 梵唄設無遮大會則爲之陳初武帝詔求宋齊故事太
 常卿周弘讓奏曰齊氏承宋咸用元徽舊式宗祀朝饗
 奏樂俱同唯北郊之禮頗有增益皇帝入壇門奏永至
 飲福酒奏嘉胙太尉亞獻奏凱容埋牲奏隸幽帝還便
 殿奏休成衆官並出奏肅成此乃元徽所闕永明六年
 之所加也唯送神之樂宋孝建二年秋起居注云奏肆
 夏永明中改奏昭夏帝遂依之是時並用梁樂唯改七
 室舞辭今列之云

皇祖步兵府君神室奏凱容舞辭

於赫皇祖 宮牆高嶷 邁彼厥初 成茲峻極

綬樂簡簡 闕寢翼翼 裸饗若存 惟靈靡測

皇祖正員府君神室奏凱容舞辭

昭哉上德 浚彼洪源 道光前訓 慶流後昆

神猷緬邈 清廟斯存 以享以祀 惟祖惟尊

皇祖懷安府君神室奏凱容舞辭

選辰崇饗 飾禮嚴敬 靡愛牲牢 兼馨粢盛

明明列祖 龍光遠映 肇我王風 形斯舞詠

皇高祖安成府君神室奏凱容舞辭

道遙積慶 德遠昌基 永言祖武 致享從思

九章停列 八舞迴墀 靈其降止 百福來綏

皇曾祖太常府君神室奏凱容舞辭

肇迹帝基 義標鴻篆 恭惟載德 瓊源方闡

享薦三清 筵陳四璉 增我堂構 式敷帝典

皇祖景皇帝神室奏景德凱容舞辭

皇祖執德 長發其祥 顯仁藏用 懷道韜光

寧斯闕寢 合此蕭薌 永昭貽厥 還符翦商

皇考高祖武皇帝神室奏武德舞辭

烝哉聖祖 撫運升離 道周經緯 功格玄祇

方軒邁扈 北舜陵媯 緝熙是詠 欽明在斯

雲雷邁屯 圖南共舉 大定揚越 震威衡楚

四奧宅心 九疇還叙 景星出翼 非雲入呂

德暢容辭 慶昭羽綴 於穆清廟 載揚徽烈

嘉玉既陳 豐盛斯潔 是將是享 鴻猷無絕

天嘉元年文帝始定圓丘明堂及宗廟樂都官尚書到

仲舉權奏眾官入出皆奏肅成牲入出奏引犧上毛血

奏嘉薦迎送神奏昭夏皇帝入壇奏永至皇帝升陛奏

登歌皇帝初獻及太尉亞獻光祿勳終獻並奏宣烈皇帝飲福酒奏嘉胙就燎位奏昭遠還便殿奏休成至太建元年定三廟之樂採梁故事第一奏相和五引各隨王月則先奏其鍾唯衆官入奏俊雅林鍾作太簇參應之取其臣道也鼓吹作皇帝出閣奏皇雅黃鍾作太簇夾鍾姑洗大呂皆應之鼓吹作皇太子入至十字陛奏胤雅太簇作南呂參應之取其二月少陽也皇帝延王公登奏寅雅夷則作夾鍾應之取其月法也皇帝入寧變服奏皇雅黃鍾作林鍾參應之鼓吹作皇帝出寧及升座皆奏皇雅並如變服之作上壽酒奏介雅太簇作

南呂參應之取其陽氣盛長萬物輻湊也食舉奏需雅蕤賓作大呂參應之取火主於禮所謂食我以禮也撤饌奏雍雅無射作中呂參應之取其津潤已竭也武舞奏大壯夷則作夾鍾參應之七月金始王取其堅斷也鼓吹引而去來文舞奏大觀姑洗作應鍾參應之三月萬物必榮取其布惠者也鼓吹引而去來衆官出奏俊雅蕤賓作林鍾夷則南呂無射應鍾太簇參應之鼓吹作皇帝起奏皇雅黃鍾作林鍾夷則南呂無射參應之鼓吹作祠用宋曲宴准梁樂蓋取人神不雜也制曰可五年詔尚書左丞劉平儀曹郎張崔定南北郊及明堂

儀注改天嘉中所用齊樂蓋以韶爲名工就位定協律
校尉舉麾太樂令跪贊云奏懋韶之樂降神奏通韶牲
入出奏絜韶帝入壇及還便殿奏穆韶帝初再拜舞七
德工執干楯曲終復綴出就懸東繼舞九序工執羽籥
獻爵於天神及太祖之座奏登歌帝飲福酒奏嘉韶就
望燎奏報韶至六年十一月侍中尚書左僕射建昌侯
徐陵儀曹郎中沈罕奏來年元會儀注稱舍人蔡景歷
奉勅先會一日太樂展宮懸高組五案於殿庭客人奏
相和五引帝出黃門侍郎舉麾於殿上掌故應之舉於
階下奏康韶之樂韶延王公登奏變韶奉珪璧訖初升

下殿奏亦如之帝興入便殿奏穆韶更衣又出奏亦如
之帝舉酒奏綏韶進膳奏侑韶帝御茶果太常丞跪請
進舞七德繼之九序其鼓吹雜伎取晉宋之舊微更附
益舊元會有黃龍變文鹿師子之類太建初定制皆除
之至是蔡景歷奏悉復設焉其制鼓吹一部十六人則
簫十三人笳二人鼓一人東宮一部降三人簫減二人
笳減一人諸王一部又降一人減簫一庶姓一部又降
一人復減簫一及後主嗣位耽荒於酒視朝之外多在
宴筵尤重聲樂遣宮女習北方簫鼓謂之代北酒酣則
奏之又於清樂中造葦鵬留及玉樹後庭花金釵兩臂

垂等曲與幸臣等製其歌詞綺豔相高極於輕薄男女
唱和其音甚哀

一入殿殿前一公然其詞綺豔相高極於輕薄男女
一入殿殿前一公然其詞綺豔相高極於輕薄男女
一入殿殿前一公然其詞綺豔相高極於輕薄男女
一入殿殿前一公然其詞綺豔相高極於輕薄男女
一入殿殿前一公然其詞綺豔相高極於輕薄男女
一入殿殿前一公然其詞綺豔相高極於輕薄男女
一入殿殿前一公然其詞綺豔相高極於輕薄男女
一入殿殿前一公然其詞綺豔相高極於輕薄男女
一入殿殿前一公然其詞綺豔相高極於輕薄男女
一入殿殿前一公然其詞綺豔相高極於輕薄男女

隋書卷十三終

[Faint bleed-through text from the reverse side of the page]

